

S P O N G I A  
Q V A  
A B S T E R G V N T V R  
C O N V I T I A E T  
M A L E D I C T A  
E Q V I T I S P O L O N I  
C O N T R A  
I E S V I T A S.



*Inscriptus Catalogo Congreg.  
Cracovien. B.M.V. G. P. M. P. L. C.  
1656.*

Anagramma Authoris.

Sanis recta salus.

C R A C O V I Æ  
Typis Andreae Petricouij. Anno Do-  
mini, M. D. X C.



SPONGIA

QVA

ABSTERGENTIA

CONVULSIVA ET

MALIGNA

CONTRA

CONTRA

DESVITAS

*Cim. Qu. 5023*



Antiquaria

Antiquaria

CAVIA

Antiquaria

Antiquaria

Antiquaria



# S P O N G I A;

Q V A

## ABSTERGUNTUR CONVITIA, ET MALEDICTA, EQVITIS POLONI CONTRA IESVITAS.



THEVS SIS, AN IVDÆVS, HÆreticus, an Schismaticus, ater an albus, Iesumastyx procacissime, ignoro: Catholicum esse non credo: Christianum vix puto; Iuuenem, quem simulas, eumq; leuissimum, nugacissimum, maledicentissimum, ventosissimum concedo. & hoc ipso nomine non verborum, sed virgarum flagellis dignissimum statuo. ita nil maturum, nil meditatum, nil sobrium, nil ingenuo dignum, nil veritati consentaneum; sed omnia singulari stultitia, & inhumanitate oblita, conuictis & maledictis facta; nec solum vestigia; sed ipsa falsitatis, rebellionis & seditionis cubilia, in ea, quam contra Iesuitas suscepisti actione perspicio. In qua si quam voluptatem maledicendo concepisti; dabo operam v; verum audiendo amittas. Sed tuam, o patria charissima, miserrimam faciem prius deplorabo, in qua *CHRISTI* iste nescio quis perduellis, audacia pro sapientia armatus, libertateq; tua & indulgentia abusus, iuuenilem suam ferociam, videri vult consilium, & tanquam è cælo delapsus, in subsellia Senatorum inuolat: consulendi decernendiq; partes vsurpat: manum amatorijs leuitatibus fœdatam, ad Reipub: moderationem admouet: & qui tacere nunquam adhuc didicit, loqui in conspectu Magnatum, legesq; Draconicas, libertari nostræ repu-



stræ repugnantes figere, tanquam in Megeræ pixide cal-  
lamum intingens, non erubescit. Homo, quem ob ætatis  
imbecillitatem, censoriam istam virgulam, eorum quos  
docendos & monendos suscepit, intelligentissimorum  
virorum autoritati submittere, & in Academico adhuc  
puluere, aut in Grammaticorum scholis, sub magistri  
ferula sedere, latereq; oportebat. Quam adolescentis au-  
daciam cum plenâ fraudis, plenam periculi, summa cum  
patriæ turpitudine coniunctam, & omnium in vtraq; Re-  
pub: sententijs damnatam atq; reprobata ostendero;  
vim ingentem mendaciorum, quæ iste ad insaniam effu-  
xit, calumniarumq; acerbiter, quibus actionem suam  
infrat, breuissimâ oratione refutabo. Non tamen agam  
summo iure, nec omnibus vestigijs, omnes calumnias  
persequar: eligam ea quæ maximè excellunt, & in qui-  
bus videre possitis omnes istius inesse culpas maximas,  
Hæresis, perfidiæ, dementia, contumeliæ, seditionis, re-  
bellionis, summi in Deum, in Reges, & in omnes bonos  
contemptus. Nam si adolescentem vobis denudarem à  
pectore, cicatrices proculdubio aspiceretis non ab ho-  
stibus Reipub: sed in mulierum contubernijs susceptas;  
nec esset quisquam in patria, qui illum mori satis esse  
putaret. Illud autem inprimis mirari satis nequeo, quòd  
Actorem hunc, istæ Musæ, quarum amator videri vult,  
nec intelligentiorem, nec mansuetiorem reddiderunt.  
Nam si se hominem esse meminisset, rationem bono sibi  
consilio à Deo immortalis datam, in fraudem bonorum  
non conuerteret: vicissim autem nisi se iuuenem oblitus  
esset, tacendi; non loquendi, discendi; non docendi, ob-  
temperandi; non imperandi partes vsurparet: & vestram  
præterea sapientissimi Senatores autoritatem & pruden-  
tiam non contemneret; nisi veterem illam dignitatem &  
seueritatem vos amisisse putaret. quod certè putat, cum  
in omnia omnium vestrum, munera & officia furenter &  
licentiosè



licentiosè inuolat: regendæ Reipub. artificium sibi arrogat, se vnum in illius videndis vulneribus lynceum, reliquos omnes talpas putat: quasi hoc esset proprium Equitis Poloni officium (huius enim vocabuli splendore aures vestras reddere sitientes desiderat) rerum omnium ordinem sursum deorsum agere, flammam vndis miscere, imma summis paria facere. cum tamen scientis sit (ait Plato) non diuitis, de quacunq; re bene consulere. Nam vt Æmon ille huic nostro dissimillimus adolescens in Antigone loquitur.

*Quicunq; se solos sapere, linguâq; vi  
vel pectoris pollere, quam alij non habent,  
Existimant, isti resecti sæpius  
comperti inanes sunt.*

Equidem apparet Tyronem istum nunquam illud Ecclesiastici sapientis præceptum auribus vsurpasse: In medio Magnatum non præsumas: & vbi sunt senes non multum loquaris. Nec illud; Adolescens, loquere in tua causa vix: si bis interrogatus fueris, habeat caput responsum tuum. in multis esto quasi inscius, & quasi tacens simul & quærens. Nec illud etiam; Cum Roboam reprobo senum consilio, iuuenum sententiam securus Regnum Israelis amisit.

Illud stupeo, quod ne in Cicerone quidem legerit; Adolescentiæ ineunti, maximam inesse imbecillitatem consilii. Multa (ait ille) in nostro collegio præclara sunt, sed hoc in primis, quod vt quisq; ætate antecellit, ita sententiæ principatum tenet. Quodq; illud in Diuino Platone non obseruauerit; Tacere debent coram senibus iuniores, cedere illis locum atq; assurgere, & vt parentes colere. O fili (ait Ætheniensis ad Cliniam) iuuenis adhuc es, nec dubito quin progressio temporis faciat, vt de multis aliter, quam nunc sentias: expecta igitur oro, vt tunc de rebus maximis iudices. Homerus quoque;



Αἰεὶ δ' ὀπλοτέρων ἀνδρῶν φρένες ἠερέθονται  
Οἷς δ' ὁ γέρον μετέησιν, ἅμα πρόσσω καὶ ὀπίσσω  
λευσοῖ, ὅπως ὄχ' ἄριστα μετ' ἀμφοτέρωσι γενήτατ.

**Id est.** *Semper vero iuniorum virorum mentes pendunt  
quibus vcrò senex intersuerit simul præsentè & future  
Prospicit, vt valde optimè cum vtriusq; agatur.*

Sed apparet profectò Actorem istum nullas istiusmodi  
sobrias cogitationes habuisse cùm scriberet. Verisimilius  
est ea quæ sunt iuuenum, mente & animo pertractasse;  
quo vestis genere, quo calcei colore, qua forma pilei, ad  
conuiuia accedendum: quis tonsuræ modus seruandus,  
& quemadmodum in muliebri confessu, coronam vnã  
in capite, alteram in collo, reticulumq; ad nares sibi ap-  
poneret plenum rosæ. Sed verba mittamus ignem quæ  
habeant.

Posteaquàm ergò visum est homini ventosa sua lo-  
quentia præfidenti de eodem, quod aiunt, oleo & opera;  
& Pontificis Romani authoritatem contumeliæ aculeis  
pungere: & Regum christianorum maiestatem carpere:  
& regni Senatores cæcos & mutos facere, & Dei seruos  
lacerare: rebusq; clarissimis tetras tenebras obducere;  
(videte quæso Senatores quàm multa sunt in vno istius  
calamo vulnera) **CHRISTI** nos vicissim cogit charitas,  
vt veritatis propugnatione suscepta, Pontificem contu-  
melia, Reges inuidia, Senatores iniuria, Dei seruos calu-  
mnia liberemus; rebusq; omnibus lucem afferamus. Non  
quòd existimemus, tutiorem vitam nostro præfidio vi-  
cturos in patria Iesuitas. Quid enim ab adolescentis gar-  
rulitate periculi? Sed vt exemplum sequamur humanita-  
tis & officij: vt contagionem istius impudentiæ imitandæ  
præcludamus: vt ne labor quoq; noster iis defuisse viris  
videatur; quorum labore fit, vt religio christiana minus  
in patria nostra quàm ante laboret. Nusquam est tutius  
calamum stringere, nusquam irasci & excandescere, nus-  
quam etiam errare tolerabilius, quàm cùm in amore ni-  
mie



mio (vt loquitur Augustinus) veritatis, & in reiectione  
nimia falsitatis exandescimus. Qui enim non satiatur  
amore erga IESUM (ait Chrysostomus) hic nec vnquam  
satiabitur pugna aduersus eos suscepta, Iesum qui ode-  
runt. Gregorius verò Nazianzenus; Nequaquam, ait, eum  
feruorem damnare debemus, absq; quo nihil fieri præ-  
clare, siue pietatem, siue virtutes cæteras spectes, potest.  
Et Basilius; In aliis modesti sumus, inquit, & omnibus  
reliquis humiliores; vbi verò Dei negotium periclitatur,  
cunctis aliis contemptis ad Deum solum respicimus. ita  
vt gladij, bestia, vngues carnem dissecantes potius deliciae  
nobis sint, quàm tormenta. Te igitur appello, fili  
tenebrarum. Ais. omnibus quidem charissimam esse patriam, illos  
tamen propter iniquitatem temporum, in hanc causam multis odiosam non  
audere descendere, ne illorum oratio multorum varias voces ad inuidiam  
& odium excitaret. Ego verò patriæ charissimæ etiam atq;  
etiam gratulor, neminem in ea inuentum esse præter vnum  
te, ita impudentem, qui niuem auderet atram dicere, aut  
arma nefaria pro falsitatis propugnatione, contra vim  
veritatis assumere. Suadeo tibi vt circumspicias, quàm  
recto cõsilio sapientissimis Regni Senatoribus maculam  
hanc aspergis: aut quo tuo commodo reliquorũ ciuium  
præstantiam laceras; cum ira cæcos omnes putas, vt  
præsentem patriæ pestem non videant: ita verò mutos &  
inuidiæ metu consternatos; vt ad æquissimæ causæ pro-  
pugnationem descendere, proq; ciuium capite verba fa-  
cere nemo audeat. Quam tuam audaciam, quibus legum  
vinculis, vtrum eculeo, an exilio refrenare volet, Amplif-  
simus Senatus, ipse viderit; nos tibi vitam non inuide-  
mus: mentem optamus meliorem, non enim hominem,  
sed hominis errorem odisse didicimus, & quò magis ama-  
mus hominem; hoc magis perire cupimus errorem. At  
vide quàm tui oblitus es. Animi tui angustia, ne peror-  
antium quidem consuetudinem, aut Rhetoricarum præ-  
ceptionum ordinem capiunt. Quorum enim tibi beneuo-  
lentiam



lentiam conciliare debebas initio, eos in ipso actionis tue vestibulo, pungis illico, & omnium intemperantissimè in Auditores tuos, grauitate (vt ais) doctrina, & rerum gestarum gloria præstantes iuuenilis amentiaæ tuæ crapulam exhalas; cum ereptam illis affirmas hominum potentia, iniquitate, crudelitate, non solùm dicendi facultatem, sed etiam sentiendi libertatem. Absit huic tuo verbo veritas: auertat à patriæ capite infaustum omen hoc Deus: Non cadat in Nobilissimos animos ista obiectio. An tu Equites omnes mortuos putas? Id enim est Equiti Polono liberum esse quod viuere: & viuere quod liberum esse. Rumparis necesse est *μισόφιλε*. Equitem Polonum in Regno, nisi vel liberum, vel mortuum non videbis. ita, vt nõ ob aliud affirmare te voluisse putemus, ereptam Polonis, nescio quorum hominum potentia sentiendi libertatem; quàm vt isto quoq; loco notas maximas, immò sedem, immò cubilia mendaciorum tuorum videamus. Sed, in rebus notissimis non moremur. Illud tibi non possum non gratulari, quod perorante te non acciderit quod olim Sextilio Enæ Poetæ pingue quiddam & peregrinum in suo carmine more Cordubensi sonanti. Is proscriptionem Ciceronis in domo Messalæ Coruini recitaturus, Pollionem Asinium aduocauit, ac ita cæpit;

*Desendus cicero est, Latiaq; silentia lingue.*

Id vero audiens Pollio, vir disertissimus, iniquo prorsus animo tulit, Latinam linguam ex vrbe Roma cum Cicerone in exilium actam audire. Confurrexit itaq; & è media concione abiit dicens. Ego istum auditorus non sum, cui mutus videor. Sic tu magnam profecto debes gratiam auditoribus tuis, quòd quos in Repub: tanquàm cæcos & mutos accusasti, te audire garrientem perrexerint, surdos propterea fortasse non dixisti, ne insanus haberere, si surdis de Repub: loqui perrexisses.

*Quod Rcipub. vulnera memoras, Veterem comitorũ consuetudinem abrogatam, nouam introductam, pristinum Electionis morem mutatum, barbaros*



barbaros milites, exercitus numerosos, rapinas, caedes, incendia, pericula,  
minas, clamores, contumelias, lachrimas, depopulatos agros, nobiles eiectos,  
Virgines abreptas, Cracouia obsidione pressam, caede & incendiis vastatam.

Vtinam in istiusmodi tempora patria charissima nunquam incidisset: sed istius cladis origo, nota apud omnes & peruulgata est. Nos non bellorum & seditionum, sed veritatis defensionem suscepimus. Optima (ait ille) ciuiliis belli defensio, obliuio est. Si ab illis quoque consiliis, tui similes iuuenes abfuissent, quos & tu nosti & ego praeterco; non tantis tempestatibus pulsatam Rempub: vidissemus. Sed abiit huius tempus querelae. Caput actionis & accusationis tuae videamus. Ais: ego Romanae Ecclesiae propemodum alumnus dico hanc unam monachorum familiam, quae a IESU saluatore nomen habet, ad perniciem multarum Rerumpub: esse institutam.

Si dixisse vicisse est, herbam ut victori porrigo. At quam abs te facile dicitur, tam a me facile negatur. Crimen audio sine teste, sententiam sine consilio, damnationem sine defensione. Tu quidem quod dicis Aiacei clypeum, ego Iouis sandalium puto: teque illi ipsi Aiacei flagellifero per omnia similem statuo, qui cum Vlysse de Achillis armis in Graecorum iudicio contendebat: a quibus cum esset abiudicatus, praer iracundiae impetu in furorem actus, gregem pecorum inuasit, existimans se Graecos omnes trucidare. Arietem autem qui caeteris eximia magnitudine eminebat, cum Vlysses putasset, ligatum flagellauit. Ita tu de statu mentis ob odium veritatis deturbatus, cum cupias Catholicos omnes unam ceruicem habere quam praecederes, Iesuitas potissimum quasi coniuratos Euangelicorum hostes, verborum flagellis emendare decreuisti. Quid si verum ego, huic tuo clypeo clypeum, umbonem umboni, hastam hastae, galeam galeae, viro virum opposuero: tibi profecto probandi partes incumbunt.

Dico itaque: Ego Romanae Ecclesiae non propemodum ut tu (vox haec non nisi Euangelicorum est) sed per omnem modum, ut in sunt qui se Christianos esse meminerunt,

B

alumnus:



alumnus: dico hanc vnam familiam, quæ à *IESU* saluatore nomen accepit, ad salutem Christianæ Reipub: esse institutam. Tibi certè Ecclesiæ Romanæ propemodum alumno, propemodum, mihi verò per omnem modum alumno, per omnem modum erit fides adhibenda. Nonne rectè dixi initio, quòd te Christianum non puto. An licet quenquam hominem lynceum vocare, qui propemodum cæcus est? An esse sanus quisquam potest, qui propemodum mortuus est? An sapientem vocabis, qui propemodum insanus est? Si propemodum Ecclesiæ alumnus es, alumnus non es. Si propemodum vir bonus es, vir bonus non es. Profectò scitum est vetus illud verbum: Facilius esse decem Elephantes sub vna veste, quàm vnum Cyne-dum occultare. Tu, quod impij faciunt, in circuitu ambulas. Et ipsa veritas, quæ nihil timet, nisi taceri, per tuum iugulum, inuito te, erumpit. Tertullianus certè Hereticos omnes infideles appellare non dubitat: propterea quòd adhuc de fide disputant. Qui enim disputat, ait ille, nondum credit: qui nondum credit, nondum Christianus est. Quid diceret, si te propemodum alumnum Ecclesiæ audiret? Profectò paganum propemodum & infidelem statueret. Sed hæc mittamus. Nil mirum est consilium intelligendi adolescenti loquaculo, isto quoq; loco defuisse. Verùm tu causas & rationes moliris, cur ita de hominibus istis sentias: quas equidem rectè putas, per arduum tibi fore demonstrare. Audiamus. Ais *Iesuitas à vestris Theologis pestem esse pronunciatos, cum in primario templo Lublinensi, tum in summo templo Cracouensi.*

Si vestros Theologos illos animarum piratas intelligis, quos verbi vocatis Ministros; falsum est peites illas in summis vtriusq; vrbis templis verba ad populum pro concione habuisse. Christus enim in illis templis ex Maria virgine in Bethleem natus, nō Antichristus Islebiensis Luterus, ex tetra incubo satus, non Calvinus stygmaticus, non Beza Sodomiticus, non Volanus, non Gregorius, non



**rus, non Biefaga, non Paklepka, non Vardega hæreticus**  
 colitur. **CHRISTI** Dei viuentis, non Ochini aut Blandrata verbum è superiore loco annunciat. Si cum sis angelus Sathanæ, transfiguras te in Angelum lucis, & vestros Theologos intelligi vis Ecclesiæ Catholicæ Romanæ doctores & concionatores; ne sic quidem vicisti, Meminisse te oportet, inter duodecim Apostolos Iudam, inter septem Diaconos Nicolaum extitisse; inter decem à lepra mundatos, vnum solum regressum debitas Deo gratias pro reddita sanitate reddidisse. Fungos aliquos esse oportuit (si modo verum est quod ais) aut intelligentium virorum carcinomata, (non enim quenquam nominas) qui non ponere, sed proijcere verba didicerunt, nec esse nefas putant resorbere quod vomuerunt. Iniuriam infert cæteris, qui vnus in omnibus sententiam sequitur. Lippis quoq; oculis, lumen solis molestum est; & omnis ægrotanti amara est medicina; idq; etiam te ipsum animaduertisse argumento est. Paulò post enim ad summorum virorum auctoritatem recurris: vt velut hædera suspensa, sententiam tuam facias vendibiliorem. Illius fortasse memor, quod Hecuba ad Vlissem apud Euripidem:

λόγος γὰρ ἐκ ἀδοξόντων ἰόν

κ' ἐκ τῶν δοξόντων αὐτὸς οὐ ταῦτόν στένει.

*Nam ab inæstimatis proficiscens oratio,*

*Et ab æstimatis haud quaquam tantunde m valet.*

Ego verò fatebor quod res est. Video isto loco intelligendi consilium tibi non defuisse. summos enim patriæ nostræ Heroas memoras, qui toras ætates in Reipub: negotiis contriuerunt: qui si à partibus tuis starent, ex stulto insanum te facerent præ gaudio. At ingenij tui imbecillitas altitudinem consilij non capit, quo isti abundant. Sic enim in patria nostra in omni laudis genere vixerunt, sic clauum Reipub: moderati sunt, sic omnia consilia ad salutem patriæ explicata semper habuerunt; vt nefas sit existimare, quam tu patriæ pestem putas, eam ipsos fuisse



in patriæ visceribus tolleraturos, pestem si putassent. Lynceis sunt oculis, longissimè omnia prospiciunt: e-  
munctas nares habent, facillimè omnia odorantur: pa-  
triam verò sic amant, vt præ illius salute omnia quæ sol  
iste aspicit, inferiora ducant. Isti pestem non viderent?  
isti pestem non intelligerent? isti pestem non auerterent?  
Nimis iniquus es in tam laudatos viros, mastigia: si tam  
acres & generosos animos hominū iniquitate cogi posse  
existimas, vt ardenti patriæ flammis iniectas negent.

Tria sunt, ait Nazianzenus, quibus instructum esse  
consiliarium bonum oportet: rerum experientia, amore  
publici boni, & oris libertate. Tu si quidquā eorum tan-  
tis viris adimis, Senatores eos Regniq; consiliarios ne-  
ges necesse est: quo tuo bono, dies te docebit. Si illum  
ipsum quem nominas Zamoiscium, exercitus Ducem, ali-  
quando legisses, (cæteros dignitatis & honorum gradus  
prætereo, virtutes enim Zamoiscij magis suspiciendæ  
sunt quàm honores) illum esse verum Senatorem, in eius  
de Senatu libello didicisses; qui ita semper vixerit, vt  
omnia consilia, atq; facta ad solam honestatem referat:  
non sibi, sed patriæ se natum putet: nec vlla in potestate,  
auaritiæ prædam aut libidinum fructus, sed instrumenta  
adiumentaq; moris maiorum, disciplinæ, ac æquitatis tu-  
endæ & conseruandæ, quærenda arbitretur: nullasq; sol-  
licitudines, nullos labores iuuandę patriæ causa recuset:  
nullā cupiditate, nullis voluptatum illecebris, nulla com-  
modorum spe, nullo periculorum metu, animum suum,  
non modo flecti, sed ne tentari quidem patiatur. Ita pro-  
fectò res habet. Senator ardens amore patriæ, non quid  
passurus, sed quid acturus sit, aspicit. Mori potest; de  
studio & consilio iuuandī, potentia vlla, iniquitate, cru-  
delitate deduci non potest; vultu, fronte, oculis, voce,  
manu, consilio, re, prodesse Reipub. non desinet: si quid  
obstitit, remouebit: si quis fauces oppresserit, etiam ta-  
cendo iuuabit. Fingas quæ voles, mendaciorum archi-  
tecte, sapi-



recte, sapientissimi Senatoris Miscouij Episcopi Craco-  
uiensis verba; dabis Illustrissimò Præsuli, huius quoq;  
calumniæ rationem, res enim longe aliter habet quàm  
narras. Accipe, quod si negare voles, non video cur te  
hominem putem. Miscouius Noscouio in Episcopatu  
Plocensi prius accessit, postea successit. Collegij Pul-  
touiensis fundamenta iacta inuenit, auxit, fouit, locu-  
pletauit, promouit: paterno semper animo, vultu, fron-  
te, oculis, omni hilaritate Iesuitas omnes complexus est:  
& vniuersum Collegij studijq; Pultouiensis progressum  
Iesuitarumq; operas non solum non impediuit, sed etiam  
promouit. Ad Cracouiensem verò translatus, Episcopa-  
li sua autoritate, & templum S. Barbaræ, & Ecclesiam S.  
Stephani, Parochialem vocant, eisdem attribuit. An vt in  
eis Ecclesiæ Romanæ dogmata euertant? An vt seditionū  
incendia excitent? An vt omnium in Repub: mores bo-  
nos, & omnium comprobatione institutos pessudent?  
Hoc tu si putas, idem est ac si putares Miscouium nec  
Episcopum esse, nec bonum patriæ suæ ciuem. Non ver-  
borum, ô iuuenis vlmeæ, sed virgarum flagellis tibi ista  
erunt expianda. Zamoiscium verò Cancellarium Ducēq;  
fortissimum, optimum, vt Isocratis verbis vtamur, Regis  
ac Regni thesaurum, quod tecum sentire fingis, toto, quod  
aiunt, cælo erras. Non dissentit ille, sed consentit cum  
Iesuitis. Ea quippe illis ministeria in templis cæterisq;  
Ecclesiasticis officiis & muneribus concedit, quæ ipsi  
sponte sua, in se, pro gloria Saluatoris susceperunt. Hoc  
nullo pacto ferri oportere iudicat, quod & ipsi fugiunt,  
& quantum in ipsis est detrectant, vt scilicet ad Reipub:  
negotia se ingerant. Ac ne sis nesciens, narro tibi, ô Iesu-  
mastyx, quod mihi credas velim; Mortis instar Christi  
seruis accidere consueuisse, quoties à sermone Dei (sue  
enim orant Deo loquuntur, siue legunt Deus illis loqui-  
tur) ad consuetudinem seculi pertrahuntur. Sæpe acci-  
disse audiuius, vt nonnulli Germaniæ, Galliæ, Poloniæ



quoq; nostræ Principes, datis ad Generales Iesuitarum  
Præpositos litteris, diligētissimè postularent; vt aliquot  
è Societate & è suis contuberniis, in eorum aulis viuere  
paterentur: ad quorum aspectum & correctionem aula-  
rum asseclæ erubescerent, atq; ad officium reuocarentur.  
Scio quoq; sapiēssimè negasse Præpositos quod peteba-  
tur: cauentes ne socij quæ semel repudiarunt, seculari-  
bus sese vicissim negotiis admiscerent. Principes au-  
tem ad ipsum Romanum Pontificem Præpositorum  
Præpositum, litteras dedisse; rogantes, vt autoritate sua  
generali præciperet, quod ita valdè postulabant. Scio  
hos ipsos Generales in genua prouolutos supplicasse vi-  
cissim Pontifici, vt ne rem inuidiæ periculiq; plenam præ-  
ciperet, nec vllos extra Societatem & contubernia viuere  
socios pateretur: Sed repulsam esse passos: seriâq; man-  
data accepisse, vt Principum petitioni gratificarentur.  
Hæc tu vera esse credas oportet. Non enim isto loco Al-  
cinoi Apologum, aut Afini mortes recitare decreuimus.  
Edam & Principum nomina: teq; rerum testimoniis, eti-  
amsi relucteris, opprimam. Talis fuit in Germania supe-  
riore Archiepiscopus Moguntinus & Treuerensis, S. Ro-  
mani imperij electores: Talis Episcopus Bambergensis,  
Basiliensis, Herbipolensis, Pasauiensis, Archiepiscopus  
Salsburgensis, Abbas Fuldensis. Tales Serenissimi Ar-  
chiduces Austria: Tales serenissimi Bauariæ Duces Al-  
bertus & Vilhelmus: Talis fuit in Germania inferiore  
Princeps Illustrissimus Ioannes ab Austria; & qui illi in  
gubernandi munere successit Fernesius Dux Parmensis.  
Talis fuit in Gallia Dux & Cardinalis Lotaringiæ: Ta-  
les in Hispania & Lusitania omnes ferè Principes & Epi-  
scopi. Stephanus porro Rex Poloniae Serenissimus, de  
cuius laudibus nulla vnquam ætas conticescet; nonne ex  
intima Italia virum doctissimum, Toletum, Belarminum,  
Gregorium de Valentia, euocare, ad aulam suam cona-  
sus est? Nonne qui felicissimè regnat Sigismundus ter-  
tius, accer-



cius, accessit in arcem Cracouensem viro venerabili  
Ioanne Paulo Campano Proninciali, diligentissimè po-  
stulauit, vt ad aulę suę comitatum, Petrum Scargam ver-  
bo & opere potentem adiungeret? Non commemorabo  
Principes Illustrissimos Radziuilos, qui in aulis suis præ-  
cipua quædam ornamenta desiderari interpretantur, si  
nullos in comitatu suo habeant Iesuitas: Viuunt itaq; in  
aulis Iesuitæ, sed coacti: loquuntur de Repub. sed inter-  
rogati. Iste inquam ipse, quem nobis opponis, sapientis-  
simus Regni Cancellarius, tum à Nuncio Apostolico, tum  
à Prouinciali Regni Poloniae semel & iterum postulauit,  
vt sibi in intimam Russiam proficiscenti, aliquos è Socie-  
tate comites adiungeret, quorum opera tum in refutan-  
dis Schismaticis, tum in conuincendis Hæreticis, quo-  
ties se daret occasio, vteretur. Sæpè etiam Knifsinium,  
& in alia loca, priuaræ pietatis gratia, euocauit: eorumq;  
potissimum opera in reuocanda ad Ecclesię societatem  
Illustrissima coniuge sua Radziuila felicissimè vsus est.  
Pestes ergo Zamoiscius in patriæ perniciem aluit? pe-  
stes ad suam consuetudinem, pestes ad mensam, pestes  
ad consilium adhibuit? Non cadit hæc immanitas in He-  
roicum illum animum. Facilius quisquis ista tua lege-  
rit, te mendacem esse perspiciet, quàm hostem patrię Can-  
cellarium. Pico Medico viro doctissimo quæ tribuis,  
agnosco. Scio quòd plurimis in patria vitam dedit: tibi  
verò si iam dudum Elleborum porrexisset, non tot insani  
capitis excrementa in pagellas vomuisses.

*Voces hominum viduarumq; querimonias memoras: easq; arte & inge-  
nio Iesuitarum vasis argenteis & omnibus ornamentis aureis spoliatas ais.*

Nos contra asseueramus: Nullius nos vnquam ho-  
minis lachrymas & eiulatus audiuisse; nullum vas argen-  
teum & aureum in omnibus eorum contuberniis, & cœ-  
naculis aspexisse, quod ereptum diceretur. Diligunt illi  
quidem cum Propheta decorem domus Domini: idq;  
summo opere laborant quod Paulus præcipit, vt ea quæ  
Dei sunt,



Dei sunt, omni adhibito ordine, summa qua fieri potest dignitate & cæremonia Deo reddantur. Inde porro fit, vt audientium & intuentium animi vehementiùs excitentur ad cultum Dei, aureis & argenteis ornamentis illustrandum: quæ equidem non dubito, quin vestras Euāgelicas cupiditates, illam inquam rapiendi clependiq; consuetudinem magnopere irritent: cùm in templis & altaribus exposita quandoq; vasa videatis, quæ vestra esse cuperetis. Mihi profectò contigit adhuc videre neminē, qui quidpiam apud Iesuitas inuenerit, quod suum dicere possit. Lepidè quidam de Ministris & Apocopis Euāgelicis dixisse perhibetur: Oculis eorū nil gratius occurrit, quàm mulier. Lingua nil loquitur expeditius, quàm maledicta in Papistas. Aures nil libentius audiunt, quàm Rape, clepe, harpaga. Nares nil odorantur suauius, quàm exustorum templorum & monasteriorum nidorem. Tactus solo tantum sanguine Christianorum delectatur. Nimis autem in patriam iniquus es iudex, nimis trux in eos quos appellas Senatores, cùm in tanta rapiendi consuetudine, tantam in Senatoribus & subfelliis, indulgentiam profiteris, & suum cuiq; ius reddi negas. Syluam tu vt video latrociniis infestam, patriam tuam putas, non Regnum legibus descriptum; in quo sanè impudentissimè tricaris, quo nomine crede mihi, miniatum suo tempore funiculum non effugies. Tales olim gentilium Philosophos extitisse Eunapius memorat, qui cultoribus idolorum persuaferant; Christianos in occultis antris, & intimis montium recessibus, vim ingentem auri & argenti asseruare consueuissent. At posteaquam data esset militibus omnia scrutandi euertendiq; potestas, pro cellatis vasis, innumeras sanctissimorum virorū reliquias, quas idem Eunapius vocat, salita damnatorum capita; pro veste picta, horrida cilicia, pro cœnaculorum ornāmētis, sacros libros, pro reliqua suppellectili, nodosos funiculos, ferratosq; cingulos inuenerunt. Nil quippe Sancto-  
rum con-



rum contubernia præciosius habebant quàm paupertatem, nec in illis quicquam carius videtur quàm ipsi. De Roffensi Episcopo sanctissimo Christi martyre vtrum aliquid vnquam inaudiueris, ignoro. Is cum esset Henrici octavi Angliæ Regis iussu in tetrum carcerem compingendus, Euangelici quidam Equites tui similes, aurea & argentea Episcopi vasa spe deuorauerant. Cum autem in eius conclaue furenter inuasissent ac ferream cistulam reuulsissent, pro nummis aureis cilicinã vestem, valde horridam, & aliquot funiculos nodosos sanguine imbutos, quibus corpus suum castigare consueuerat, inuenerunt. Simile quiddam in exigua Hosii Cardinalis hæreditate repertum fuisse memoratur.

*Quod ais : clamantur hæc in templis in conspectu trinitatis, ante imaginem christi, omnium sanctorum & sanctarum, ad commouendos sanctos & sanctas ab his qui religionibus sanctorum & sanctarum præsumunt.*

Flosculi isti, ô elegantissime adolescens, loquendiq; moduli, non nisi Euangelicorum sunt, è loculis communioribus Philippi, aut è Caluini institutiunculis excepti: At olim in Iuliani capite meditati, & in schola Luciani vsurpati, quibus olim, æquè vt nunc vobis Euangelicis, ludus, iocusq; erat, templa Dei vocare lupanaria, Trinitatem cerberum tricipitem, Christi imaginem idolum Moloch, Sanctos & Sanctas opprobrium hominum, eorumq; reliquias Diis inuisas hominibusq;. Quàm egregiè porrò Amasiam idoli Bethel sacerdotem exprimis, qui & ipse Amos Prophetæ, verbum Domini ex ore Domini loquenti, rebellionem obijciebat: cum ipse Deo & mandatis eius apertissimè rebellaret. Sed ô fœlices Iesuitas, quòd à vobis Euangelicis vituperantur, qui nihil vnquam nisi grande aliquod bonum, vituperare consueuistis. Maximum innocentia argumentum statuo, accusari ab Euangelicis. Non potest pietatis, non potest reus agi religionis, quem condemnat hæreticus.

*Quod dolere te simulas plurimas scholas à Iesuitis dissipatas esse, & Academiam*



Academiã Cracouiensem celeberrimã, solitudine fœdam atq; squalidã, quæ literatorum iuuenum quatuor millia aliquando numerabat, nulla antiqua ornamenta retinere.

Vtinam retineret. Sed quis istam fœdam solitudinem inuexit? Quis squalidam fecit? Quis antiqua ornãmẽta eripuit? Id quidem tu improbè dissimulas, sed ego præfultoris munere fungar. Florebat Academia Cracouiensis, quando patria vniuersa Euangelicos tuos ignorabat, quando in sinu & gremio tetri Cacodemonis Euangelicorum magistri & ministri latitabant, quãdo nulli erant in patria nostra Lutheristæ, Calvinistæ, Anabaptistæ, Budeistæ, Volanistæ, Biesagistæ, sed omnes vno eodemq; nomine & erant & vocabantur Christiani, vel, vt vos vocatis, Papistæ. At posteaquam eiusmodi sectas, in patriæ perniciem cœpistis introducere, secta quoq; ac dissipata est illa quam prædicas Academiae integritas, sectæ sunt leges, secta sunt iudicia, secta comitia, secta subsellia, omnia in patria secta, dissecta, disiecta, dissipata videmus. Quid enim mali non videmus? Vos cœpistis, vos primi cœpistis, templum contra templum, cathedram contra cathedram, altare contra altare erigere: consequens erat, vt scholæ quoq; contra scholas suscitarentur, & Academiae Cracouiensis maiestas, & illa quam prædicas frequentia, minueretur. Qui sunt autem, qui scholas contra scholas erexerunt? Vos inquam Euangelici, teterrimi legum & regum euersores. Repete memoria, si quam habes, scholas Euangelicorum, Pinczouiensem, scholam Volensem, scholam Leuartouiensem, scholam Chmielnicensem, Brogensem, scholam Grodziscensem, scholam Posnaniensem, & id genus alias, in quibus æras imbecilla, ad omne audaciæ blasphemiarq; genus instituebatur. Illæ inquam fuerunt, quæ squallidam solitudinem in Academiam Cracouiensem inuexerunt. Nam si quas scholas regendas leuitè susceperunt, pro schola non contra scholam Cracouiensem, instituerunt,



instituerunt: cum schola Cracouiensi in cultu veri Dei,  
 & in orthodoxa veritatis cōseruatione conueniunt, cum  
 schola Cracouiensi præceptores & scriptores Hereticos  
 reijciunt: Philippos, Sturmios, Spangebergios, Erasmos,  
 & istiusmodi alios: cum schola Cracouiensi, vitam pro  
 religione profundere parati sunt. Vis rerum testimonia  
 adiungam? Vestræ scholæ & Synagogæ præceptores,  
 vestri patroni & fautores, vestri magistri & ministri, au-  
 tores & incentores fuerunt, vt schola Cracouiensis dissi-  
 paretur. Quid insignes pleræq; Regni familiæ Euange-  
 lico seu Lutherano spiritu de statu mentis motæ (è qui-  
 bus hodie tanquam è spinis rosas processisse videmus &  
 gaudemus) contra Cracouiē Academiā egerint, obscu-  
 rum non est. Vos acerbas & capitales sententias, sæpè in  
 particularibus, quandoq; in generalibus Regni comi-  
 tiis, in homines innocentissimos Academiæ Cracouiens-  
 sis Professores pronunciaistis. Vos è priuatis oppidorum  
 scholis Magistros & Baccalaureos Cracouienses extur-  
 bastis: & in eorum locum externos homines, terræ filios  
 ex Italia profugos, Geneuæ, Basileæ, Tiguri ob vim fla-  
 gitiorum virgis cæsos, naribus auribusq; truncatos, sce-  
 lerum stygmata manu carnificis impressa circumferren-  
 tes, substituiistis. Vos Artium & Philosophiæ Magistrum  
 Volscium, nobilissimum scholæ Cracouiensis membrum  
 indignissimè & iniustissimè enecastis. Vos exulem Stan-  
 carum in scholam Pinczouiensem recepistis: vos in ci-  
 uium locum externos homines nescio quos Synagoni-  
 stas, Theodori Bezæ symmistas recepistis: vos illum mi-  
 nistrum ob adulterium, quod in despectum Papæ (sic  
 enim facinus excusabat) commiserat, auricula mutila-  
 tum, vt angelum è cœlis delapsum, in vestrum comita-  
 tum recepistis, eiq; liberos vestros erudiendos tradidi-  
 stis. Vos igitur estis, & vestri Euangelici magistri, & mi-  
 nistri, qui Academiæ Cracouiensis solitudinem attuli-  
 stis: & eam, quam deploras, illius faciem reddidistis, nec



adhuc vnquam legibus illius, & institutis, interitum  
machinari destituitis: quod tu aut concede, aut abi, &  
ad Antyciras nauiga.

*Quod ais habuisse Poloniam nostram ante istos resuiticos monachos,  
viros eruditissimos, oratores vehementissimos, Philosophos acutissimos,  
Iureconsultos prudentissimos, Theologos omni dicendi grauitate, copia  
atq; ornatu instructissimos.*

Verè ais: sed addere debuisti, quòd ne nunc quidem  
habere desit, & habebit per Dei gratiam plures etiam:  
nisi vos cursum bonarum literarum totiusq; pietatis  
progresionem retardaueritis, aut Regnum, quod absit,  
vniuersum seditiosissimis consiliis ad extrema pericula  
adduxeritis. Non omnia, ait Tacitus, apud priores me-  
liora, sed nostra quoq; ætas multa laudis, & artium imi-  
tanda posteris tulit. Quædam, ait Seneca, initium ab  
aliis trahunt, & tamen initiis suis maiora sunt. Princi-  
pia enim sua semper sequens magnitudo obruit.

De Luca & Leopolda Concionatoribus tu fortasse  
auditione accepisti: ego sæpe vtrunq; pro concione dis-  
ferentem audiui: & vtriusq; consuetudine sum olim vsus  
familiarissimè: quorum sermone si dignus esses, repræ-  
henderent te proculdubio ex ipsis beatorū sedibus, quòd  
cum illis omnes in patria concionatores mortuos putas.

De Hosio verò nunquam satis laudato Cardinali,  
quem rectè quispiam ob doctrinæ sublimitatem, vt Areo-  
pagitam Chrisostomus *πεταυδὺ τὸ ὄργανον*, id est volucrem  
cæli dixerit, deq; Cromero eius successore videri tu quidē  
vis, quasi eos summo loco habeas. Sed si magnus apud  
te esset Hosius, non magnus apud te esset Fricius. Si Ho-  
sium Ecclesiæ Romanæ lumen verè putares: Fricium  
Anathema, Maranatha iudicares. Non me tenebo, quin  
tibi Hosiani nominis amplitudinem explicem, quid de eo  
viro Itali, Galli, Germani, Hispani, Angli, Hungari, Sco-  
ti, Lusitani, Hiberni; quid in Asia, quid in Africa, quid  
in ipsa



in ipsa quoq; patria nostra, clarissimi & sapientissimi vi-  
ri, quibus matellam porrigere dignus non es, senserunt,  
atq; ad vniuersæ posteritatis memoriam scriptum reli-  
querunt, vt si talem voles credere, qualem isti faciunt, in  
illius quoq; de Iesuitis iudicio, quod cōmemorabo, acqui-  
escas. Alij columnam Ecclesiæ vocant, alij ornamentum  
Collegij Cardinalium, alij splendorem curiæ Roma-  
næ, alij Phœnicem Cardinalium, alij Polonicum Patriar-  
cham, alij senem verè Abrahamicum, alij malleum hære-  
ticorum, alij nostri temporis Augustinum, alij alterum  
Poloniæ Stanislauum, nouum Bessarionem, Melchisede-  
chicum sacerdotem, nunquam satis laudatum Ecclesiæ  
defensorem, rectæ fidei custodem vigilantissimum, orbis  
miraculum, patrem patratum, Romani Senatus orna-  
mentum, Apostolicæ sedis propugnaculum, Christi for-  
tissimum Athletam, formidabilem hæreticorum aduer-  
sarium, senem suauiloquentem, alterum Numam, mi-  
cans Latij lumen; alij sinceræ pietatis magistrum, Dei  
interpretem, alteram Pauli manum, alij aliis laudibus  
celebrant, & vsq; ad sydera tollunt: idq; te scire volui, ne  
tam deinceps, vt nunc fecisti, ieiunè tam commemorabi-  
lis viri nomen vsurpes; de quo tu quidem vereris, ne ex  
commemoratione illarum virtutum & eruditionis re-  
crudescant vulnera, ex istorum hominū morte accepta.  
Ego verò etsi Hosium immortalem, si fieri potuisset, esse  
voluissim, fit tamen nescio quo modo, vt illi vitam ere-  
ptam minus doleam, ne Volanum, ne Czechouicium, ne  
Budneum, ne cæteras quisquillas, ne te, ne tui similes ali-  
os; in Senatu & ad Senatum de Repub. loquentes & gar-  
rientes audiat. Mortem ille quidem timuit nunquam,  
sed optasset etiam, si te tuiq; similes, clauum Reipub.  
maderaturos cognouisset.

*Producis etiam Bembum, sadoletum, Contarenum Polum, viros omni  
exceptione maiores. & infers: Quid horum simile habent Iesuite?*

Non es versatus in libris Theologicis, calumniator.



Fuit magnus Bembus, sed nec paruus Canisius: fuit elegans Sadoletus, sed nec infans Maphæus: fuit zelantissimus Contarenus, sed nec Gregorius de Valentia tepidus est. Fuit Polus eloquens, sed nec Perpinianus mutus est. Quo loco Turrianum, quo Toletum, quo Belarminum habeas, ignoro: sed citius tu, orbis Christiani iudicio, & infans habebis & improbus, quàm isti nō magni.

*Ais lucubrationes eorum ita refutatas ab Hæreticis, & ita profligatas, ut luculentam quoque plagam tota Ecclesia nostra Romana acceperit.*

Ita profligatas? ita refutatas? Pudet me victoriæ vestræ, Evangelici: sic profligastis Iesuitas, ut reuerti in certamen possint: sic refurastis, ut tacere non possint. Velim impudentiæ tuæ, pudentiorem exitum quæsiuisses. Omnis quidem arrogantia odiosa est: sed illa de multarum rerum cognitione multò molestissima. Languens es ineptissime Iesumastrix circa quæstiones verborum, & nihil sciens. Ecclesia Romana luculentam plagam à Iesuitis accepit? Hic ego te profectò mentitum dicerem, nisi vererer ne putares (ita enim stupidus es) me dicere te mente tota constare. Id quidem verum esse vellent Evangelici, ut Romanam Ecclesiam oppugnarent Iesuitæ: sed interim ipsi eorum magistri & ministri, editis in vulgus libellis, & pictis propolitis tabellis, in oculis omnium gentium confitentur, nutantem Ecclesiam Romanam, Iesuitarum studio, labore, diligentia, ope omnium rerum sustineri, quas tu profectò oculis ipse tuis vsurpare in Euangelicorum Bibliotecis potuisses, si in lucem aliquando è tenebris & puluere Leuartouienti prodixisses. Sed tu, ut video, non solum es, sed etiam videri vis infans ineptissimus. Videris autem quàm tibi rectè cum Volano tuo Zuingliocaluinista conueniat, illo scilicet in Lituania succiplenæ cænæ structore. Is enim Iesuitas ait, tam obstinatè doctrinam Ecclesiæ Romanæ defendere, ut nullū in ea prorsus, licet corruptissima, nāuum agnoscat.

*Quod ais: Ecclesia nostra Romana. Vereor ne tibi inuito verbum hoc exciderit:*

*Aut*



*Aut ars vulcanum, (ait ille) aut forceps ignara scellit.*

*Et quoniam voluit cadere, cudit se.*

Sic tu vestra voluisti, nostra Romana dixisti: nisi forte eo sensu voces nostram, quo pedem & nostrum dicimus, & lecti & scamni & carminis, quo canem & venaticum & marinum & sydus appellamus. Sed potesne tu esse Ecclesie Romanae membrum, qui tantum Hæretico Fricio tribuis, à Romana Ecclesia reprobato, ut hominem bobus stabulandis, stercorandisque agris deditum, propterea quod de Repub: nescio quid garriat, Hosio & Cromero similem facias: qui ex nomine Sanctissimæ Trinitatis & è Crucifixi imagine, Sanctorumque & Sanctarum memoriis delitias tibi facis? Potesne tu esse Ecclesie Romanae filius, qui religiosorum virorum statum, quos vulgo Monachos vocamus, tam vilia mancipia putas, ut Iesuitas, ignominie causa Monachos voces? Omnium est communis inimicus, qui hostis suorum est. Nemo, crede mihi, sapiens proditori suorum unquam credendum putavit. Eadem itaque fide abs te dictum putabo, id quod fateris, qua illud, quod negas.

*Facis disputationis Lublinensis mentionem inter catholicos & Antitrinitarios, & Anabaptistas. Infantem te dixeram, nunc mendacem conuincio. Habita est ea disputatio in Ecclesia Lublinensi Societatis Iesu. Progressus in medium Czechouicius, Archiflamen illud Anabaptisticae doctrinae, sesquipedalibus verbis professus est, se non contentionis studio, sed inueniendae veritatis desiderio in arenam descendere. Deumque precari, ut quicumque opprimendae veritatis studio, & cupiditate inflammatus verba mendacij loqueretur, illico potius obmutesceret. Quid autem consecutum est? Audi & iniurato crede, nec quenquam tuis fabulis fallas. Cum multa illa sua Prosopopeia contra Deum, Ecclesiam, contra primatum Romani Pontificis, & Petri claus hinc & inde acta essent, nec acquiescere*

*veritati*



veritati clamorus Czechouicius vellet; ea protinus percussus est maledictione, quam erat comminatus veritatem oppugnantem. Subito enim hominem vox defecit: nec vllum amplius contra Iesuitam potuit verbum fundere: ita vt à suis è media disputatione languens abduceretur. cum interim nil aliud sentiret incommodi, quam vocis defectionem. In eius locum successit Niemoieuius, quem tu ais verbera sensisse: ego nescio, aut, si sensit, scio virum nobilem non libenter pugnoscere, multò minùs Iesuiticos. Faciliùs ego tibi ostendam edidisse Petrum Scargam pugnoscere Evangelicos, cuiusdam Oczucnouij, nec satis hoc. Calumniis etiam appetitum probabo, quasi pro cõcione docuerit, omnes obuios Evangelicos in faciem conspuendos: sed nondum huius venit tempus sermonis.

*Quod libellum doctissimi viri posseuini facem vocas ad excitandum incendium, cumq; ais omnis eruditionis suae armis doctrinaq; instrumentis, ad barbaricam crudelitatem & feritatem decurrere.*

Si eam Epistolam intelligis, quam vir ille zelantissimus Serenissimo Regi Stephano aduersus Volanum inscripsit, vbi ait, Hæreticos ab antiquissimis Synodis anathemate plexos, atq; vt putrida membra ab Ecclesiæ corpore reflectos. Non Posseuinum (ò carissime) reprehendas necesse est, sed eos quorum id quod dicit, decretis & autoritate confirmat. Theodosium, Valentinianum, Marrianum, Carolum Magnum, Ludouicum Galliae Regem: sed omnes orthodoxos Reges & Principes. Quid Reges? ipsum vas electionis Paulum, qui iubet eos abscindi, qui fratres conturbant. Quid Paulum, imò Pauli Dominum & Præceptorem Christum, qui vt Ethnicum & publicanum, habendum pronunciat, Ecclesiam qui non audierit. Nollis, fat scio (leges enim vt laqueos oderunt Evangelici) sanctissimi illius Korcinensis Decreti in Generali Parlamento, sub anno Domini 1438. contra Hæreticos promulgati, vllam isto loco fieri mentionem. Sed nec illius constitutionis, quam in oppido Vielunensi

Wladillaus



Wladislaus Jagello promulgauit, cuius verba sic habent. Quicumq; in Regno Poloniae nostro, & terris nobis subiectis, haereticus, aut haeresi infectus, vel suspectus de eadem, fautor eorum vel director repertus fuerit, per nostros Capitaneos, Consules ciuitatum, & alios officiales ac quoslibet subditos nostros, siue in officiis, siue extra uiuentes, uelut Regiae Maiestatis offensor capiat, & iuxta exigentiam excessus sui puniatur. Haec inquam tu omnia sempiterna sepulta obliuione cuperes, ne te non solum Caesareis; sed Regum quoq; tuorum legibus & decretis reprobaturum damnatumq; audiamus. Sed ueritas nil aliud timet quam taceri. Expedit tibi audire, quod auditum non possis damnare. Obstringit sese illo Corczinensi decreto Rex, & ordines omnes Regni, sub fide & honore, quod insurgere uellent contra omnes ad eorum destructionem (haec enim sunt legis uerba) quicumq; in Regno errores haereticos, tenere, fouere, promouere, manu tenere uellent. ex cuius tu legis laqueis, nunquam euades profecto, quam diu propemodum eris Ecclesiae Romanae alumnus. nisi forte ita impudens esse perseueres, ut sicut Possuini libellum, sic hoc ipsum Regis & Regni sapientissimum decretum, facem uocare libeat, ad excitandum incendium, idq; sine dubio uerbum uomisses, si Decreti huius fieri mentionem aliquando audiisses.

Ais deinde: *quamobrem concilium non conuocatur? cur publica disputatio non instituitur?*

Quo longius progredieris, in plures te laqueos induis, quorum ex nullo (crede mihi) te unquam expedies. Si coactum Concilium Tridentinum cognouisti, cui illud ipsum patriae nostrae lumen pulcherrimum, quem paulo ante dilaudasti, Hosius Cardinalis praefuit, cur, quaso te, de industria in odium offensionemq; ueritatis irruis? Si per aetatis imbecillitatem, perq; occupationes adolescentiae, nihil audiuisti, ex me audias. Noli quaso te turpe ducere, quod diu non didicisti discere. Si cum



Romana Ecclesia sentires: si quod fingis matrem eam tu-  
am putares: conuocatum, coactum, publicatum, cele-  
bratum, perfectum, absolutum, exequutioni mandatum,  
Concilium Tridentinum non ignorares. Sed vos rectè  
quidam Æsopo & Marcholfo similes facit, qui arborem  
inuenire nullam potuit, in qua sibi vitam vellet iniecto  
laqueo eripere. Euangelicorum proprij sunt isti fremi-  
tus. Fiat Concilium: libera cogatur Synodus. Postquã  
coacta est; aiunt non esse liberam: postquam libera decre-  
ta est; aiunt ad Cæsarem, non ad Pontificem, ius congre-  
gandi pertinere. Postquam congregatum tamen est; ar-  
mis illud hostilem in modum dissipant, & Concilium  
nationale, in intima Germania efflagitant, nec satis hoc;  
Colloquium publicum & disputationem in Comitiiis  
Imperiĩ decernunt. Vidimus, legimus, Comitiorum re-  
cessus, vbi ista quæ dicimus per Euangelicos Principes  
ab optimo Cæsare & ab Ordinibus Imperiĩ, Regalibus  
adiunctis minis efflagitantur. Vidimus & leges Ratisbonę  
descriptas, è quorum sententia Vormatiensis disputatio,  
institui debebat: ex ea porro pacem toti Germaniæ red-  
ditã iri sperabant Euangelici; sed natus est ridiculus mus.  
Nam cum illi ipsi Euangelici Doctores, & Rabini, asse-  
ssores, Iudices & Notariĩ, conuenire inter se non possent;  
nullo facto operę pretio, è medio cursu disputationis abi-  
erunt. Lepidè itaque facis, quòd Concilium congrega-  
tum ignorare te simulas: quod ni faceres; te Hæreseos  
conuictum, vt Hæreticum damnatum, Anathemate per-  
cussum, Sathanæ traditum nescire non posses. Fugis vi-  
delicet, vt ante diximus, illud audire, quod auditum non  
posses damnare. Molesta quippe est lippis oculis solis  
claritas: dura sunt improbis animis præcepta pietatis. Le-  
geres quoq; in illo ipso Concilio, de ea quam sceleratè la-  
ceras religione Clericorum Societatis Iesu, deq; pio eo-  
rum instituto à sancta sede Apostolica approbato. Sed  
parcam stultitiæ tuæ, nec diutiùs, in isto sermonis genere  
immora-



immorabor, ne nobis illud magistri tui occinas: Quid nobis & tibi, venisti huc ante tempus torquere nos.

Ais deinde: *Iuuentutem numerosam habent suis in scholis, quibus artibus eam colligant & retineant, metuo, ne serò admodum animaduertamus, & tum demum velimus ei malo remedium adhibere, cum non poterimus.*

Non miror quòd non videas, quibus artibus iuuentutem & colligant & retineant Iesuitæ. neq; enim præ iracundia, vel officij tui, vel periculi, vel pietatis, vel humanitatis, vel veritatis rationem habes vllam. At viderunt viri Dei, illa orbis Christiani lumina, Hofius & Cromerus, quorum alter Societatem primus omnium in Poloniam introduxit: alter etiam fouit. Vidit optimus Episcopus & Senator Noscouius, qui Pultrouienſe, vidit Episcopus Poſnaniensis Konarski, qui Poſnaniens. vidit Episcopus Valerianus, qui Vilnensē Collegium, exa edificarunt: & Nobilissimam Regni iuuentutem, his, quos tu odisti, socijs & præceptoribus regendam & gubernandam tradiderunt. Vidit post istos omnes sapientissimus Rex Stephanus, cuius inuicta virtus sola pietate superata est, qui Polocense, Rigense, Derpatense, Claudiopolitanum, Albaulienſe, Varadinensē Collegium excitauit. in quo iuuenum animos, ad omne officij munus Societas erudiret. Vidit & videt Illustrissimus Archiepiscopus Gneznensis Karnkouius, qui maximo suo sumptu scholam Calissiensē excitauit. Vidit & videt Comes Rozrazouius Vladislauiensis Episcopus, qui felicissima Nouensis Collegij in Pomerania iecit fundamenta. Vidit & videt Illustris: Princeps Olicæ Dux, Nicol: Christoph: Radziuilus, qui Niesuesensē Collegium erexit: Vidit ad extremum is qui nobis feliciter imperat, Sigismundus tertius sapientissimus Rex. Vidit sapientis: Regni Senatus. Vidit ordo Equestris vniuersus, qui illud ipsum Iesuitarum Niesuesensē Collegium, & attributos illi redditus, in Regni Comitij publico Senatusconsulto, approbavit, esseq; Iesuitis in Regno perpetuos voluit. Hos si



non vidisse, non intellexisse, non animo & cogitatione  
percepisse dixeris, quibus artibus iuuentutem nume-  
rosam ad suas scholas colligant Iesuitæ, quibusq; re-  
tineant; dignus profectò es, cui oculorum cubilia  
*ὀφθαλμοί* eruant. Sed agam tecum leniùs, dignus saltem es,  
qui in eas oras deporteris; vbi viuos homines mortui in-  
cursant boues. Congruit veritati ridere, ait Tertull: quia  
lata est: de amulis suis ludere; quia secura est. Multa ri-  
dendo possunt reuinci, ne grauitate adorentur.

Vis audire quibus artibus iuuentutem numerosam  
ad suas scholas colligant Iesuitæ? Nil in discipulis præ-  
ter discipulos amant. Quidquid docent; faciunt. (*Estima-  
ri autem præceptoris magnitudo non potest, vita qui  
docet*) *Doctos facere discipulos, sed magis bonos con-  
tendunt. Ad vsum vitæ non ad consuetudinem scholæ  
loquuntur. Nouè multa, sed noua nulla docent. Nil  
habent melius quod optent, quàm vt discipuli De-  
um & proximum diligant: & hoc solum auditoribus  
suis, ex omnibus quas profitentur litteris proponen-  
dum putant, quod virum bonum faciat. Vitæ in eo  
fructum statuunt, si discipuli quotidie magis cælum;  
mundum minus diligunt. Huc accedit, quòd non  
contenti sunt remedia monstrare; etiam admouent. Non  
sicut medici inter ægros quos perambulant, sine vllò af-  
fectu venam tangunt, & abeuntes remedia disponunt;  
sed sicut amici, propria & peculiari cura & studio di-  
gnum discipulum putant. In singulos dum docent, ani-  
mum & cogitationem dirigunt; vt quæ pro lectione pro-  
ponuntur, non quasi in medium proiecta manibus exci-  
pian, sed quasi singulis porrecta in animum demittant.  
Operam enim quam præstant, non tantùm ipsis præstant,  
sed tanquam ipsis. Nemo potest dicere; nullam habet  
cogitationem mei: non in sinu meo ponit; sed in medium  
projicit verba. In turba enim multorum, præcipuam de  
singulis curam habent. non tanquam publici partem, sed  
tanquam*



tanquam proprium cuiq; dantes beneficium. Laborem in docendo, & molestum illud rædium, quod oscitantes discipuli pariunt, sine supercilio deuorant: hortando bonam indolem erigunt: laudando animum addunt, monendo desidiam discuriunt: ingenium latens & pigrum, iniecta manu extrahunt: nolentibus timorẽ adhibent: nec ideo discipulis profunt, vt profunt & sibi; aut eos faciant vtilitatis suæ instrumenta; sed omne laboris sui præmium in eorum profectu statuunt, ad suspecta tempora occurrunt: nullum illis ministerium oneri, nullum fastidio est. Profectum discipuli; vitam: mortem; inertiam putant. Præceptores profitetur; amicos agunt, & quod in omnibus eorum studijs eximium est; cum sciant paucis opus esse ad bonam mentem litteris; omnem simul sapientiam in cõpendio radunt; **TIMERE DOMINVM**. Illud quotidie sine modo, & sine fine discipulis occinentes. In quo vno omnes disputationes, omnes litteras quorumlibet Philosophorum: omnes leges quarumlibet ciuitatum: omnia præcepta Mosis & Prophetarum: omniumq; diuinarum & humanarum disciplinarum summam contineri, dicit Augustinus; Diliges Dominum Deum tuum, ex toto corde tuo, ex tota mente tua, & proximum vt teipsum. Huc Phisicam dirigunt, quoniam omnes omnium naturarum causæ in Deo creatore sunt. Huc Ethicam; quoniam vita bona & honesta, non aliunde formatur, quàm cum ea quæ diligenda sunt, quemadmodum diligenda sunt, diliguntur, hoc est Deus, & proximus. Huc Logicam, quoniam veritas lumenq; animæ rationalis, non nisi Deus est. Huc etiam Rempub: Neq; enim conditur & custoditur optima ciuitas, nisi fundamento & vinculo fidei, firmâq; concordia. cum bonum commune diligitur, quod summum ac verissimum Deus est, atq; in illo inuicem syncerissimè se diligunt homines, cum propter illum se diligunt; cui, quo animo diligant, occultare non possunt. Ad quem certè finem nisi omnis omnium artium



& disciplinarum, omnium Doctorum & Præceptorum  
cursus dirigatur, scientia quæri potest, inueniri non po-  
test. Hæ sunt artes (ô bone) quibus animos capiunt. Hæc  
vestigia quibus incedunt. Hæc ossa quam obijciunt. Hi  
sunt hami quos inserunt. Hic viscus cui discipuli inhæ-  
rescunt. Tales se planè Doctores isti noui & Præcepto-  
res Iesuitæ exhibent, quales esse iubet doctissimus Lyri-  
neñ cum ait; O sacerdos, ô tractator, ô doctor: Si te  
diuinum munus idoneum fecerit, ingenio, exercitatione,  
doctrina; esto spiritualis tabernaculi Beseleel: prætiosas  
diuini dogmatis gemmas exsculpe, fideliter coapta, adorna  
sapienter, adijce splendorem, gratiam, venustatem.  
Intelligatur te exponente illustrius, quod antea obscu-  
rius credebatur. Per te posteritas intellectum gratule-  
tur, quod ante vetustas non intellectum gratulabatur:  
eadem tamen quæ didicisti, ita doce, vt cum dicas nouè,  
non dicas noua. Fas est etenim, dicit paulo post: vt pri-  
sca illa cœlestis Philosophiæ dogmata processu tempo-  
ris exornentur, poliantur, limentur: sed nefas est vt cõmu-  
tentur, nefas vt derruncentur, nefas vt mutilentur. Acci-  
pian licet euidentiã, lucem, diiinctionem; sed retine-  
ant, necesse est, plenitudinem, integritatem, proprietatem.

Exclamas deinde: *Putatisne, senatores, disciplina monachorum  
iuuentutem ad res rectè gerendas erudiri posse?*

Et hoc impotentis animi signum est, omnibus in vni-  
uersum sine fine irasci. Sed tu de industria in Regum &  
Legum offensionem incurris. Tecumne es? O quàm verè  
Paulus nil scientem Hæreticum appellauit! Hic ego te  
non verbis è Donato; sed legibus, sed Decretis, sed statu-  
tis, sed grauissimis Senatusconsultis è Regni Statuto  
conuincam: in quo lex illa Sigismundi Regis laudatissi-  
mi legitur, quæ Regni Poloniæ. Abbates omnes obstrin-  
git, vt Nobilium filios in suis monasteriis ad omne officij  
munus instituendos & erudiendos suscipiant, verba le-  
gis sic habent; Tenebuntur Abbates certum numerum  
puerorum



puerorum Nobilium fouere in Monasterijs, & illos inibi hominibus doctis artibus liberalibus dare instituendos, iuxta quod unicuiq; Abbati, Domini Episcopi illorum locorum consignabunt & nominabunt. Deinde verò meminisse debebas Cazimirum Primum in Cluniacensi Benedictinorum Monachorum sodalitate educatum, & institutum, tanta cum pietatis & fortitudinis laude Regni Poloniae clauum tenuisse, vt Maslaum Masouiorum tyrannum deleret, rebelles Prussos reprimeret, acerrimos Iazuingas penitus extingueret: pacem Regno redderet: Dei cultum auget: Domicilia multa Christi seruorum erigeret: & nomen ad extremum Instauratoris Pacifici consecutus esset. Stephanus quoq; Rex laudatissimus, ille inquam Rex, cuius virtutem hostes, misericordiam victi, fidem & prudentiam, cæteri omnes perspexerunt inter eos quos ex Italia in Poloniã euocabat, vt in optimis litteris Regni iuuentutẽ erudirent, Patrem etiam Aquarium Dominicani instituti relligiosum esse voluit, præmiumq; nõ vulgare promisit. Camillum quoq; Tachierum Franciscanum, concionatorem suum aulicum: & Annibalem Rosselli Bernardinum, in illa ipsa Academia Cracouiensi, cuius causam te agere simulas, tum Philosophicas tum Theologicas litteras profiteri voluit. Iudicet lector, vtrũ tibi garrulo adolescenti, an Regi sapienti, de Monachorum disciplina fidem vellit adiungere.

*quæ tibi de moribus Italicis, Gallicis, Hispanicis in patriam inuectis garrire libuit; hæc quoq; præterijsses, si vnquam illud audiuisses, Regis ad exemplum totus componitur orbis. Reges enim & Principes externi, quos patria nostra intra hos paucos annos ex Gallia, Germania, Vngaria, ad Regni gubernacula euocauit, non quatuor aut quinque Religiosi in patriam inuexerunt, quicquid de maiorum nostrorum simplicitate & integritate detractum est. Facilius est si dicere fas est, ait Cassiodorus, errare naturam, quàm dissimilem sui Princeps possit formare Rempub.*  
Sed non



Sed non placet tibi scholas euerti. Benè est. aliter enim si diceres, verbis ego tuis lumbos defractus optarem. Placet autem veterem potius reuocare disciplinam, & patrii morè, præmia magistris & præceptoribus proponi, eos gratitudinis, & vtilitatis spe, ad scholasticum laborem suscipiendum excitari; Assentior. Age itaq; exoptatissime reformator, tabulas arripe, legem scribe, pœnam transgressori statue: iube tuos Euangelicos census retentos dissoluere: ereptos redditus reddere: decimas interuersas repræsentare: agros ademptos referre: pensiones descriptas comportare: assignata à maioribus præmia illico dependere; mox videbis, crede mihi, Academia Cracouiensis Magistros & præceptores, ad scholasticum laborem suscipiendum, magis etiam atq; magis excitari. Sed vereor, vt tui similes clependi rapiendiq; consuetudinem relinquãt, mallent illi quicquid adhuc superest, de viuo detrahere, quàm erepta reddere: idq; sine freno timoris & pudoris, vbicunq; possunt, impiè crudeliterq; exequuntur.

Ais deinde: *sed Iesuitarum opera, studio & diligentia effectum est, vt Africa, Asia, America, Persia, Romane Ecclesie instituta & placita amplectantur.*

Id quidem tu, fat scio, verum esse nolles; sed cùm rerum testimonia ipsa tua videat conscientia, etiam ipsa tua per se erubescit ratio, deficit interpretatio, obmutescit oratio: lege Surium, Maffcum: lege epistolas Indicas, lege Ribadeneiram, lege quotquot de rebus Indicis scripserunt, & linguæ tuæ modestiæ frenos impone.

Quæris deinde: *quinam sunt illi viri? quæ est ista pietas? quæ prudentia? quæ vite sanctimonia? vt tantum bonum orbi christiano importauerit.* Ausculta, & mea dicta deuora. Proprius est hic gentis nostræ mos; consilia sua, non præcedente sapientia, sed consequente experientia, moderari. Doleo quòd ita sis & tui & rerum planè omnium oblitus, vt ea ignores, quæ Gallia, Germania, Hispania, Lusitania, Vngaria, ipse quoq; nouus orbis, & vltimarum sola terrarum non ignorant,



ignorant. At si tibi Senatoris & Consiliarij munus suscipere libuit, non discere ita debebas, sed didicisse. In omnibus, ô puer, (libet te Platonis verbis appellare) vnicum principium h̄s qui benè consulere volunt, est intelligere, quid illud sit, de quo consultatur: vel omninò aberrare necesse. plerosq; verò latet, quòd nesciant rei substantiam. Tanquam igitur scientes in dispositionis principio non declarant, procedentes verò, quod par est consequitur, vt nec sibi nec aliis consentanea loquantur. Nescis ergo nesciens, aut in Repub: Christiana peregrinus; narro tibi qui sint isti viri. Si Deum nosti: aut illi res mortalium curæ esse credis, inficias ire non poteris, etiamsi sis impudentissimus, apta eum & conuenientia remedia, singularum ætatum & temporum, morbis atq; incommodis adhibere consueuisse. Cogunt (ait Augustinus) multas inuenire medicinas, multorum experimèta malorum. Magnis olim erroribus Chaldæorum populi tenebantur, cum rerum causas, ad motum syderum; non autem ad Dei potentiam, & voluntatem referebant. Sed misericors Dominus ferre non potuit, vt in errore turpissimo consumarentur. Suscitauit enim opportunissimo illo tempore, admirabilem illum Patriarcham Abrahamum, qui fuit illis quasi via rectæ fidei, creatoris omnipotentiam ostendens, & à cultu & veneratione rerum creaturarum auertens. Ægyptij mirum in modum erant præstigiatorum artibus, & incantationibus, de statu mentis deturbati. Sed Dominus amicum suum illum magnū Moysen exhibuit, qui dæmonum fraudes detegeret, & Domini potentiam & gloriam per verba & miracula prædicaret. Israelitarum rationes valde erant in aliquo tempore conturbatæ. nullum enim certum Magistratum habebant, cuius imperio tenerentur; ecce subito Samuel diuinus affulsit, qui magnum præsidium inclinatis rebus attulit, & sub vnius imperium, Dei iussu, subiunxit. Achab ille Rex impius, Deum Patrum suorum dereliquit, & diuinum cul-



num cultum manufactis simulachris adhibuit; sed Dominus Eliam Thesbiren suscitauit, qui Regis impotentiam frangeret, atq; ad vnius veri Dei cultum reuocaret. Procedente tempore suscitauit Satanas in Asia Mamalucos: suscitauit Dominus Templarios. Suscitauit Sathanas Saracenos Prolomeiden oppugnantes: suscitauit Dominus sex viros Lubecenses & Braunsuicēses primos eius ordinis autores, quem Theutonicorum appellant, strenuos terræ sanctę defensores. Suscitauit Satanas Turcas Asiam infestantes: suscitauit Dominus nobilissimū ordinem Equitum Hierosolymitanorum illis obsistentes. Saraceni Belgicam occupauerant, magnaq; premebant seruitute: suscitauit Dominus in Lusitania Equites Iesu Christi, qui vim immanem barbarorum profligarent, & suos libertate donarent.

Magna fuit olim Christianorum vis in captiuitatem abducta; & statim Dominus ordinem S. Marię, redemptionis captiuorum, duce & auctore Iacobo Aragoniæ Rege excitauit. Sed longum esset omnia, omnium ordinum & religionum genera, opportunissimis humano generi temporibus à Dei benignitate suscitata memorare. Ipsa S. Francisci, & S. Dominici familia, quàm opportuno Reipub: Christianę tempore initium acceperit, obscurum non est.

Sic existimare debes suscitata[m] fuisse à Domino, isto nostro seculo, eam quam iniquo odio tam acerbè oppugnans IESV Societatem, tanquam Antidorum quoddam earum pestium, quas Luterus in orbem Christianum introduxit. Pax & tranquillitas, qua Ecclesia Dei longo tempore fruebatur; partim extinxerat, partim debilitauerat feruorem illum pietatis, quo maiorum voluntates inflammatae videbantur. Intermissus erat frequentior Sacramentorum vsus: obtorpuerat Confessionis & Pœnitentię studium: languere cceperat conscientiarum examen, contemplationum assiduitas: meditationum desiderium;



derium: remissa videbatur hospitalium cura, Catechu-  
 menorum instructio: xenodochiorum sollicitudo: capti-  
 uorum redemptio, fraterna correctio, Concionum assi-  
 duitas, Sacrificij frequentatio, ciliciorum & maceratio-  
 num vsus: dormire quodam modo in summa Ecclesiæ  
 Dei pace videbantur homines, viuebant vitam habentem  
 vt Pindarus loquitur *μελιτόεσαν ἐν δίαν*, cōtenti præsentibus.  
 Interim venit inimicus homo & superfeminauit zi-  
 zania, earum Hæresum & pestium, quibus orbem Christi-  
 anum afflictum videmus & dolemus. Sacram scripturam  
 corruptit, Symbolum violauit, Sacramenta minuit, Tri-  
 nitatem blasphemauit, Patres & Concilia contempfit,  
 Imperia perturbauit, viam ad Atheismum aperuit. Quid  
 autem mali non fecit? Has animarum ruinas, non ferens  
 misericors & miserator Dominus; suscitauit admirabiles  
 illos Ecclesiæ suæ *ταυτες και τηλικυτους προσφατας* verbo & o-  
 pere potentes, quorum ora vos Euangelici, vestra vos re-  
 mordente conscientia, in illa die tremenda non feretis  
 Eckios, Rossenses, Moros, Polos, Taperos, Hæselios,  
 Sotos, Hosios, Cromeros, Sanderos, Socolouios, Po-  
 uodouios, & mille alios. qui cū egregiè suo munere,  
 suaq; legatione functi, pro Christo fuissent, & pleriq; eti-  
 am vsq; ad sanguinem restitissent; quos vos igne, ferro, la-  
 queo, equuleo, omni suppliciorum & crudelitatum ge-  
 nere laceratos obruncatis; & his præterea calumniis  
 onerastis, quasi quam profitebantur fidem, eam non ob  
 amorem Christi, aut veritatis studium, sed ob Papæ me-  
 tum, ob censum, redituum, Episcopatum, & id genus  
 amorem tuerentur; Visum est vicissim Domino, novos  
 homines suscitare, sine re, sine sede, sine Episcopatibus,  
 sine Abbatibus, sine pera, & gladio: inermes, incomitatos,  
 viles in oculis seculi: nil timentes nisi Deum, nil speran-  
 tes, nisi à Deo, qui mortem pro Christo lucrum putarent:  
 occidi possent, vinci non possent. quorū societas esset, vt  
 Ioannes in sua Epistola loquitur, cum Patre & Filio eius



**I**ESU CHRISTO, eosq; ceu quasdam auxiliares leuio-  
ris armaturæ copias, in medias Euangelicorum acies, in  
ipsa vestra viscera immittere. quæ vos in omnibus orbis  
Christiani partibus, quas veneno vestro infecistis, Ger-  
mania, Gallia, Anglia, Scotia, Polonia, Bohemia, Vnga-  
ria, Suetia, telis verbi Dei conficerent. veritatis spicula  
intorquerent, in vestris ciuitatibus; in oculis vestris vo-  
biscum viuerent: vbiq; vobis etiam inuitis, & nolentibus  
occurrerent: nec solùm voce & calamo, sed etiam aspe-  
ctu silentioq; suo, vestræ vos perduellionis, & rebellionis  
admonerent. & illud quotidie, quod olim vestri similibus  
hæreticis Augustinus, occinerent; Quod Dominus in  
cathedra vnitatis, posuit doctrinam veritatis. Cathedrā  
autem vnitatis in ea collocatam ostenderent, quæ caput  
est orbis, vrbe Roma, cuius fidem, vt apud Hosium legi-  
tur, Apostolica voce laudatam esse scimus, in qua per-  
petuò conseruatam eam fuisse, quæ est ab Apostolis, tra-  
ditionem refert Irenæus: cui totam doctrinam Apostolos  
vnā cum sanguine suo profudisse Tertullianus asserit. ad  
quam accessum habere perfidiam nunquam potuisse, te-  
statur Cyprianus. quam ita semper incorruptæ Patrum  
doctrinæ fuisse tenacem, vt quoties Romana fides dice-  
retur, Catholica intelligeretur, ex his quæ scripserunt,  
Hieronymus & Ambrosius, didicimus. in qua semper  
Apostolicæ cathedræ viguisse Principatum narrat Augu-  
stinus. quā hæretici fœtoris semper expertem perman-  
sisse, nec vnquam in ea, qui contrarium sentiret, sedisse;  
quin potius Apostolicam gratiam inuiolatam custodi-  
uisse testatur Theodoretus. ad quam propterea de fidei  
causis iam inde ab ipsis Apostolorum temporibus, nun-  
quam non relatum fuisse, qui seculis aliquot fuit posteri-  
or Bernardus asserit. quod ibi potissimùm sarcita iri da-  
mna fidei, spes foret, vbi fides non posset sentire defectū.  
Idq; etiam inuitis & reluctantibus vobis, ipsis inferni por-  
tis frementibus, tanto cum fructu vtilitateq; faciunt; vt  
omnis



omnis iste, quem fabricare orsi estis, Satanismus, in patria præsertim nostra, animam agere, & extremam partem deficientis Spiritus retinere videatur. Dicentibus Heluetiis; Fides Luteri iam ultra Rhenum periit: dicentibus Anglis, & ultra mare, Gallis, & ultra Alpes; Polonis, & ultra Istulam: Vngaris, & ultra Danubium. Dicentibus Italis, non transit montes: dicentibus Hispanis, nec Pireneos. Calvinismus enim velut nouus Iupiter successit, & garrulum Luterum, velut vetulum Saturnum explosit: sed & ipse iam nutat, & Trideismus exulat. His porro omnibus extremam mortiferam plagam Ateismus intemat. Vnde apparet, ô Euangelici, Christum non esse vobis propitium, qui ne defensus quidem (hoc enim agere vos fingitis) vos defendit. Quæ rerum conuersio sine pietate & prudentia Antagonistarum, & sine vitæ sanctimonia expectari certè, sperariq; non poterat. De quibus quia quaris, quænam sint ista, vt tantum bonum orbi Christiano importauerint. Respondebo tibi. Paternus affectus laborem non meruit.

Scias velim Societatis huius primum ac præcipuum esse institutum; Hæreticos ab erroribus, Catholicos à malis moribus, Gentiles à falsis de Deo opinionibus reuocare, atq; ad vnius veri Dei cultum pietatisq; studium ardentius complectendum adducere. Id autem vt efficacius præstent, verbo se prius vitæq; exemplis in suis contuberniis instruunt, diligenter enim prius omnia discunt; antequam doceant. Vitæ sordes lachrymis quotidie & oratione eluunt: carnis cupiditates comprimere, atq; sub rationis imperium subiungere contendunt, ieiunio, cilicio, humi cubatione, Dyamastygosi & id genus alijs carni repugnantibus exercitiis. Hinc sese totos ad rerum diuinarum contemplationem transferunt. in quæ quò magis exercentur, eò magis hæc quæ videtur omnia, opes, honores, vitæ commoditates, vt fumi umbram, vel sicut Paulus loquitur, vt stercora reputant. Quò magis



autem omnia istiusmodi contemnunt; hoc magis in foliis Dei amore exardescunt: hoc libentius meditationibus vacant. quas rectè quispiam conflictum esse, dixerit sine sanguine. Quem autem quis amat, omninò cauet ne vlla vnquam ratione offendat. Inde fit; vt in custodia sui ipsius vigilantissimi sint, horasq; omnes auarissimè seruent. Manè, diuina in se, & in genus humanum beneficia recognoscunt. Meridiè, & vesperi exactissimam, cum animo suo rationem ineunt, quid horis singulis egerint; omnibus vestigijs accuratissimè scrutantes, si quæ illicita desideria mentem inuaserunt: si diutius hæserunt, si consensum extorserunt: si etiam voluptatem attulerūt. Ipsam deinde linguam ad iudicium aduocant, si quid loqui pro Dei gloria omisit, si quo verbo proximum læsit, si quempiam calumnia oppressit, si tacenda dixit, aut dicenda tacuit, hinc manus & opera excutiuntur. Porro si quæ macula depræhenditur, dum paruula est, ad petram albiditur, lachrymarum balneo eluitur, Cataplasma confessionis applicatur, & vix in alteram horam medicina reseruatur. Ad eum modū disposita vitæ ratione, compressisq; carnis cupiditatibus, animi culturam adhibent seq; in diuinorum librorum, Sacra scilicet scriptura, Sanctorumq; Patrum lectione, & meditatione penè incredibile studio, & contentione exercent, volentes esse parati, iuxta Pauli præceptum, rationem reddere omni poscenti, de ea quæ in illis est fide. Postquam autem caro rationi, ratio Deo subesse atq; obtemperare didicit, ab his qui præsunt, in vineam Domini emittuntur, atq; ad operas distribuuntur. Non enim in sola contemplatione: nec in sola actione vitæ summam sitam putant: Sed quo Dei gloria, quo salus proximi, quo vocat Ecclesiæ necessitas, siue horum alterum, siue etiam vtrunq; adhibent. Alius itaq; confessionibus pœnitentium excipiendis vacat: alius Sacramentis distribuendis, alius ægrotorum & debiliū cura destinetur; alius in agone politos consolatur, alius in xenodochio



nodochio languentes curat: alius è carcere vinctos liberat, dissidentes conciliat, vagantes per vrbium vicos ad templa congregat, per exiguas villulas & deuia oppidula Catechilum & doctrinam Christianam prædicat, egentes opulentis commendat. Alij sunt vicissim qui refutandis hæreticis operam nauant, in medias sese Hæreticorum acies proiciunt, & omnia simul & faciunt & patiuntur, vt Christi Dei nostri nomen glorificetur, concionando, scribendo, disputando. Aliis non satis est orbis iste, his nostris, oculis obiectus, & his calcatus vestigijs; Oceanũ vniuersum emetiuntur, nouas gentes, ignota orbi nostro Regna & Imperia, in vltimis terrarum partibus scrutantur, quibus Deum verum annuncient. nulla deniq; est orbis vniuersi ora, sedes, locus, inter Christianos, Machometanos, Hæreticos, Ethnicos, quo non fuerit sonus Iesuitarum, *CHRISTI* nomen prædicantium, exauditus. Non remoratur eos Tyrannus, non impedit Oceanus ( & qui maior Oceano murus? ) persecutor non deterret, percussor non frangit, quominus vbiq; Dei annuncient voluntatem. Quam tu, fat scio, pertinaciam, & zelum non secundum scientiam appellabis. Sed si tibi Dominus aliquando Spiritum humilitatis, quo omnes destituuntur Euangelici, dederit. Dabit autem, si in recta fide nihil hesitans postulaueris; iudicabis profecto, nil nimium esse graue amanti. Cæterum non est difficile diuinare, quid malles. Illa tu studia hymnis chorealibus efferres, in quibus ætatis tuæ florem contriuisi. In illis tu mensis & occupationibus Iesuitas videre velles, in quibus nil agitur, quod foras proferendũ sit: vbi diurnæ nocturnæq; perporationes *ᾠδαὶ τῆς ἀλαλῆς σκυθικῆς* peraguntur, in quibus te videre possēt, vt Anacreon loquitur;

*Iuuenem in scyphis valentem:*

*minimè in scyphis pauentem:*

*Lepidum in scyphis choreuten;*

*cytharag;*



*cytaraq; concinente  
remulenta verba fundentem.*

Vbi alius inter manus è conuiuio tanquam è prælio auferatur, alius tanquam occisus relinquatur, alij fusi sine mente, ac sine vlllo sensu iaceant. quiuis vt cum aspiceret; non ingenuorum conuiuium, sed Orsensem aut Grunevaldensem cladem & pugnam videre arbitraretur. Sed solenne est, iis qui in amore & voluptatibus adulescentiam suam collocârunt, hanc etiam vitam, atque hæc studia dilaudare.

Quod ad iuuentutis institutionem attinet, quam bonis artibus & moribus imbuendam susceperunt. Si dixero; quòd Spiritus sanctus huius consilij & cogitationis initium Societati attulit, non ero similis tibi mendax. Maiorem quippe curam, ait Augustinus, adhibere oportet, in educatione; quàm in procreatione liberorum. Non enim fœlicitas est habere filios, sed bonos habere. Plato quoq; nil accuratiùs admonet; quàm optimam, ac diligentem puerorum institutionem, ex qua vna salus pèderet Rerumpub. Magistratus enim optimos haud posse fieri, nisi ciues viri sint optimi. ex quibus Magistratus creantur. Viros porrò nunquam fore tales, nisi adulescentes, pueriq; tales sint. Quamobrem etiam nutrices monuisse dicitur, vt ne turpes ac friuolas fabellas pueris occinant, ne illorum animos statim ab initio, stultitia, & corruptis imbuant moribus. Plutarchus etiam paterna putat appellatione indignos, qui plus studij ac temporis ponunt in comparandis pecuniis, quàm in filiis quibus pecuniam relinquunt, ad virtutem effingendis. neq; hoc aliud esse, quàm magnam calceorum sedulitatem habere, pedem verò ipsum paruifacere. Cicero nullum munus Reipub: afferri maius posse testatur, quàm si doceamus atq; erudiamus iuuentutem, iis præsertim moribus atq; temporibus, quibus ita prolapsa est, vt omnibus opibus refrenanda, atq; coercenda videatur. Certè D. Paulus  
Timotheum



Timotheum suum hoc quoq; nomine commendat, quòd ab infantia sacras litteras didicerit. Hieronymus verò tantus Ecclesiæ doctor, non erubuit & docere & scribere de Pacatulæ infantulæ educatione, deq; filia institutione ad Lætam. Facilis est enim ab improba vita ad improbam fidem transitus. vnde & Paulus loquitur, quòd multi repellentes bonam conscientiam, naufragauerunt à fide. Et alibi: Radix omnium malorum est cupiditas, quam quidam appetentes errauerunt à fide. Sapiens quoq; testatur, quòd in maleuolam animam non intrabit Spiritus sapientiæ, nec habitabit in corpore subdito peccatis. Spiritus enim sanctus disciplinæ effugiet fictum, & auferet se à cogitationibus quæ sunt sine intellectu. Vnde fit, vt insignis ille orthodoxæ veritatis vindex Athanasius, vitam prauam, parentem seu anteambulonem hæresis appellarit; Basilius gradum ad infidelitatem. Bonam autem conscientiam, vbi mala sedem occupauit, aut temperantiam vbi cupiditas imperium obtinuit, quàm sit difficile animis hominum inserere; tu fortasse non nosti, qui in hoc contentionis genere vestigium nullum posuisti. sed norunt hi qui quotidianum certamen, cum carne, mundo & sanguine suscipiunt. Longo tempore, ait Augustinus, magnis viribus, diuersis artibus opus est, vt persuadeatur superbis, quanta sit virtus humilitatis, vt persuadeatur cæcis, quanta sit gratia lucis: vt persuadeatur ebriis, quanta sit virtus sobrietatis. Adolescens enim, ait Salomon, iuxta viam suam ambulans, etiam cum senuerit non recedet ab ea; & Salomone verustior Iob; Ossa, inquit, eius implebuntur vitiis adolescentiæ.

Visum itaq; est Spiritui sancto tam pios excitare Sacerdotes, vt exemplo; tam doctos, vt & verbo iuuentutem erudirent: talemq; animam formarent, quam inhabitare Spiritus sapientiæ non dedignaretur. Prior est, ait August: in recta hominis eruditione, labor operandi, quæ iusta sunt; quàm voluptas intelligendi quæ vera sunt. Sed



ea de re nulla fortasse inter me & te controuersia est. Volui tamen partes earum occupationum attingere, quibus distinentur Iesuitæ, quamq; magna ratione adducti sunt, vt instituendæ Iuuentutis in timore Domini curam susciperent. teq; eadem opera, & quinam sint isti viri docere, & quænam sit eorum pietas, vitæq; sanctimonia, ob oculos ponere. Si mihi non credis, testes producam Romanos Pontifices, quos si Christi vicarios putas (id enim valde dubito) decretis eorum acquiescas necesse est.

Paulus tertius Pontifex Maximus, cùm Institutum Societatis breui formula comprehensum legisset, vehementer illud approbavit, & in eo Spiritum Dei inesse testatus est, seq; non tenues fructus sperare, neq; exiguas ex tam exiguo tenuiq; principio vtilitates ad Dei Ecclesiam peruenturas expectare. quamobrem etiam illud Apostolica sua autoritate Anno 1540. approbavit.

Iulius verò tertius ipsam etiam formulam litteris suis inseruit, recepit, & approbavit, quam hic libet inserere. Quicumq; in Societate, quam *I E S V* nomine insigniri cupimus, vult sub crucis vexillo Deo militare, & soli Domino ac Ecclesiæ ipsius sponsæ sub Romano Pontifice Christi in terris vicario seruire, post solenne perpetuæ Castitatis, Paupertatis & Obedientiæ votum, proponat sibi in animo, se partem esse Societatis, ad hoc potissimum institutæ, vt ad fidei defensionem & propagationem, & profectum animarum, in vita & doctrina Christiana, per publicas prædicationes & lectiones, & aliud quodcunq; verbi Dei ministerium, ac spiritualia exercitia, puerorum ac rudium in Christianismo institutionem. Christi fidelium in Confessionibus audiendis, ac cæteris Sacramentis administrandis, Spiritualem consolationem præcipuè intendat, & nihilominus ad dissidentium reconciliationem, & eorum qui in carceribus, vel in hospitalibus inueniuntur, & ministerium ac reliqua charitatis opera, prout ad Dei gloriam & commune bonum expedire visum



dire visum erit, exequenda. gratis omnino, & nullo pro suo in prædictis omnibus labore, stipendio accepto, se vtilem exhibeat, curetq; primo Deum, deinde huius sui Instituti rationem, quæ via quædam est ad illum, quo ad vixerit ante oculos habere, & finem hunc sibi à Deo propositum totis viribus assequi. vnusquisq; tamen secundum gratiam sibi à Spiritu sancto subministratam, & vocationis suæ proprium gradum, &c.

Gregorius quoq; XIII. Anno 1584. apertè confitetur, non immeritò fuisse ab antecessoribus suis Romanis Pontificibus multa huic Societati concessa, ob egregias, sic enim loquitur, virtutes, & dona diuinitus elargita, cum illius finis præcipuus sit, Catholicæ Religionis defensio ac propagatio, animarumq; in Christiana vita & doctrina profectus. rùm etiam proprium esse gratiæ eius vocationis testatur, diuersa orbis terrarum loca, ex Romani Pontificis per Præpositos generales directione peragrare, vitamq; in quauis mundi parte agere, vbi saluandarum sua opera animarum copiosior prouentus ad Dei gloriam speretur. His tu profectò si fidem non habebis, ego cur te Christianum putem, non video.

Sed adhuc quæris; *Quæ sit Iesuitarum prudentia.* Id equidem rectius ab Euangelicorum ministris, vel à Mexicanis & Iapponensibus Bonziis, vel à Turcicis vel Scyticis Caddis & Muleammanis quæsiuisses. Dixissent illi tibi, quod consilij genus adhibeant; quauè prudentia & solertia vtantur Iesuitæ, cum in medijs Euangelicorum & Paganorum vrhibus, cum in oculis & auribus infestissimorum Principum, Christi Dei nomen intrepidè prædicant: Christi crucifixi signa statuunt: cum quos illi Deos colunt, esse Dæmonia ostendunt: cum Idola, cum aras impias, euertunt: cum templa Deo viuenti erigunt: cum Reges sacro Baptismate tingunt: cum Bonzios idolorum ministros sub suaue Christi iugū subiiciunt. Sed ad nostra veniamus. Quære ex tuis Superintendentibus, & scho-



Iarchis, vtrum lynceos oculos, aut emunctas nares ha-  
beant Iesuitæ; cum artes eorum omnes, dolos, fraudes,  
technas, laqueos, & quas animis hominum fodiūt foueas  
depræhendunt. Qua putas solertia opus habebant, cum  
Augustæ Vindelicorum (quam quidam vestrum nouam  
vocare Bethlehem propterea non dubitat, quòd in ea na-  
tum & approbatum sit quintum hoc Euangelium, quod  
Augustanam Confessionem vocatis) sedem figerēt. cum  
illam ipsam Augustanam perfidiam pro concione damna-  
rent, collegia erigerent, adolescentes instituerent, vestris  
Magistris & Ministris intrepidè ubiq; occurrerent: cum  
animo vinci nescio, ad certissimam mortem in intimam  
Angliam penetrarent: cum inuicta mente ante Præsides  
& tyrannos starent. & Christum Dei viuentis, & sponsam  
eius Romanam Ecclesiam, Romanūq; Pontificem Chri-  
sti vicarium, ad ipsos laqueos & eculeos semiuiui & se-  
miusti confiterentur. Qua prudentia sedem Ratisbonæ  
fixerunt, Halberstadium, Erfortum, Magdeburgam; in  
ipsam etiam pene deploratam Scotiam, & alia permulta  
hæresi inquinata loca, mucronibus infesta, & non nisi  
mortis contemptoribus peruia penetrarent, & Euange-  
licos omnes Christi inimicos, & Ecclesiæ Dei perduelles  
& libenter & liberè pronuntiarent. Cum deniq; in Ægy-  
pto, in monte Sina, in ipsa vrbe Constantinopolitana,  
Dei summi voluntatem, omnibus inuitis Saracenis &  
Mamalucis annunciarent & annunciant. Res tantæ Iesu-  
mastis, non casu & fortuna, sed mente firma, consilio  
solido, diuina prudentia gubernantur. non prudentia  
carnis, quam tu solam sapere forte putas; sed prudentia,  
quam timor Domini inchoat, amor perficit.

Ais deinde: *Non tam benè refert simia simiam, nec ouum ouo,  
nec lac lacti tam simile est; quam monachus Iesuitæ; & Iesuita monacho.*

Profectò, si fatuo delectari vellem, non esset mihi lon-  
gius abeundum. Te riderem. Sed miratur alicubi Plato,  
qui fieri possit; vt aliquis in his superbè sapiat & glorie-  
tur, in



tur, in quibus nondum quicquam sapit. Tu quid sit Monachus nondum sapis; & tamen de Monachi nomine tibi delicias facis. Vide ne tua infantia, non scriptorum calamis, sed pedissequorum sibilis explodatur. Nam si quicquam vnquam, vel de Antonio, vel de Paulo, vel de Basilio, Augustino, Bernardo, & aliis sanctissimis Monachis auditione accepisses: si Chryostomum de laudibus vitæ monasticæ, si eam Homiliam, quam de Regis, & Monachi comparatione conscripsit, & Crömerus noster è Græca Latinam fecit, saltem inspexisses; si scriptores innumeros, & Doctores Monachos dilaudantes cognouisses; in Monachi nomine ita, vt facis, non luderes. Si tua inquam mater esset Ecclesia Romana, quod tibi verbum paulò ante, nescio quo modo excidit; si tu eius esses, vt videri vis filius, Monachorum appellationem probri loco non duceres. At tu præ stupore non consideras; quòd cum Iesuitas Monachis facis similes; Paulo, Antonio, Augustino, Basilio, nolens volens similes facis. Vide quã sit potens veritas, & da honorem Deo. Etiam per hostiũ veritatis, iugula cum ille vult erumpit, nec magis quidquam timet, quàm taceri, oditq; mores. Sed ego

*Non dicta tanti ponderis tua aestimo,  
Mortalis, vt perennia Deorum queas  
Temerare iura, insculpta mentibus hominum.  
Non hæc heri aut sunt nuper admodum edita.  
Vixere semper quoq; tempore cœperint,  
scit nemo*

Quoniam autem conuictorum tuorum semper incipite ex fine principium: manum tibi porrigã, vt ex isto quoq; cœno pedem extrahas. Dicam ego tibi, quid sit magis etiam inter se, quàm ouum ouo, & lac lacti simile. Tu & tui Evangelici, Paganis & Machometanis longè estis similiore, quàm Monachus Iesuitæ, & Iesuita Monacho. In hoc enim Iesuita Monacho similis est, quia Castitatem vouit, Paupertatem suscepit, Obedientiam promisit: at



in habitu cultuq; corporis differunt. Cæterum Euangelicus omnis, siue sit Luterista, Calvinista, Trideista, Anabaptista. siue cuiuscunq; tandem sectæ discipulus, nulla prorsus in re, à Pagano & Machometano dissentit. Blasphemat Paganus Christum Dei viuentis, blasphemat & Trideista: Ridet ille Baptismum; ridet & Anabaptista: Fabulam reputat Eucharistiam; reputat & Calvinista: Imagines ille reprobat; reprobat & comminuit Luterista. Sanctorum inuocationem ridet Paganus; ridet & Euangelicus. Machometus sacras Imagines deleuit, & Mechenfium quoq; ciuium suorum idola Aleth & Tagot comminuit; & Euangelici Christi crucifixi, omniumq; Diuorum imagines aboleuerunt. Machometus nullum ferre iudicem voluit suæ doctrinæ; prohibet etiam ne sui discipuli, Iudæos aut Christianos iudicare de fide patientur; idem faciunt Euangelici. Machometus diem Veneris vt diem Dominicum haberi voluit; ita Euangelici. & inter eos Lutherus, diem Dominicum Paschæ, in alium diem voluit immutari, & Carolstadius nullum alium diem præter Sabbatum esse in honore voluit. Machometani non circuncidunt, nisi septem aut octo annorum pueros; Euangelici etiam adultiores vix baptisant. Machometus Polygamiam docuit; Euangelici, Anabaptistæ liberaliter exequuntur. Hecerus enim tredecim vxores habuit: & Regiomontanus quidam è Carnifice minister, septem viuas in diuersis locis vxores aluit. Machometus vt suis piam in speciem vitam commendaret, negabat aliena cuiquam prodesse opera; Lutherus & cum eo totus Euangelicorum cætus, non modo Sanctorum negat opera aliis vtilia; sed nostra propria omnia facit peccata. Machometus sacrorum & religionis suæ, quasi quosdam Antifites assignauit, Muphtios, Caddeos & Talimeanos; Euangelici sacrorum curam & ministeria omnibus in vniuersum communia esse volunt. nec, vel vilissimos cerdones, pelliarios, vespillones, lenones, imò nec ipsas fœminas ab



nas ab ea repellunt: Machometani Christianos faciunt  
impios; quòd Christum Deum suum ederent: Euange-  
lici nos appellant θεὸν Τόρας, siue Deicidas; quòd Dei filium  
deuoramus. Summa est. nec ouum ouo, nec lac lacti, ita  
simile est, vt Euangelicus Machometano: & Machometanus  
Euangelico.

Quod ais: *vultum eos ad decipiendos homines habere accommo-  
datū, os in latebris resuiticis compositum; oculos & totius corporis habitū,  
atq; ipsam rationem ad simulandum & dissimulandum accommodatam.*

Deus bone, quàm ineptus es, quàm tui ipsius amans,  
sine riuali. De saxo scilicet, in crucem. Pudoris exitium.  
Iam mare haud est mare. Tu mare mendaciorum acerri-  
mum. Omnibus, vt video, sanctitatibus bellum indixi-  
sti. quando Modestiam, Temperantiam, Grauitatem, os  
non garrulū, oculos non vagos, incessum minimè præci-  
pitum, & orationem maturā, conuitio & repræhensione  
dignam putas. An eos esse tuis ministris Euangelicis si-  
miles malles; qui non solum esse, sed etiam videri volunt  
impudentissimi, sicut à Smidelino factum in comitiis  
Vormatiensibus legimus; vbi Lutheri verbum è loco su-  
periore, cum sago & manica picturata, & venatorio cul-  
tro ad latus prædicabat. Sed domum te reducam. Vilnæ  
habebatur Zuingliana Synodus ante triennium. Ibi v-  
nus ex Synodi ministris, in platea quadam vltra pontem  
Bernardinorum, à licitoribus castrensibus in adulterio  
captus, & in alieno habitu in arcem perductus est. Vis  
aliquid lepidum de fratribus vestris Anglicis Euangeli-  
cis audire. Tam sunt proiecti pudoris; tam sunt amici  
Castitatis & continentiae; vt eos non pudeat mulieres  
pro concione ad libidinem deligere. Cathedras enim  
ascendunt, modo non meretricia veste induti, lotiq; vn-  
guentis, compriq; crines. & vt forma placeret; oculos  
illiti. nec solum ornatu. & subcrispo capillo; sed impu-  
dentia quoq; mulieres imitantes, libidineq; calescentes,  
vagus oculis circumspiciunt; vasaq; sibi necessitatis (sic  
enim



enim appellant) in ipsis templis assignant. Sed nec per  
urbium vicos & plateas vnquam transeunt; quin illis v-  
biq; delecta sit ad libidinem mulier. Accipe exemplum, &  
iniurato crede. Lecta est ante paucos annos in tribunali  
Londinensi schedula per quendam ministrum, iudici Re-  
gio; sed per errorem porrecta, (aliam enim ad causam per-  
tinentem offerre decreuerat, quam in eodem sinu gesta-  
bat) in ea cuidam mulieri narrabat, quam ardentem in il-  
lam, dum concionaretur exarserit; quàm libenter oculos  
ad eius formam adiecerit. & id genus amores suos præ-  
dicabat, atq; ad libidinem sollicitabat. Huius autem la-  
sciuiæ vehementer puduit Regiæ potentiaæ administratos,  
nisi quod ita iam peruulgata est ministrorum impuden-  
tia; vt nullus esse locus animaduersionis videatur. Qui  
fit ergo, mi Actor, vt quam tui similes Euangelici in suis  
ministris modestiam & grauitatem requirunt, tu eam in  
Catholicis Sacerdotibus repræhendas! Si argumento  
est Iesuitas ob vultus, & vestis modestiam Sycophantas  
esse; tu, & Ministri vestri, qui sub crispo capillo, pictura-  
ta manica, gladio ad latus, vultu, vesteq; vtimini penè mu-  
liebri, prostituti pudoris homines censeamini necesse est.

*quòd eos in Dei sanctorumq; cultu imitari dicis superbas, stultas,  
atq; impudicas mulieres, quæ splendidius vestiri volunt quàm honestæ ma-  
trone. & ea ratione oculos spectatorum in se conuertere, ac eorum cupidi-  
tates inflammare.* Mome maledicentissime, putas te crepi-  
dam Veneris Praxitelianæ damnare? Si Deum amares, si  
maiestatem diuini numinis & quotidiana in genus huma-  
num beneficia cum animo tuo reputares; nullus vnquã  
tibi cultus, nullus ornatus, nullus splendor ad honorem  
Dei collatus, fatis esse magnus videretur. Sed tua super-  
bia ascendit semper. In cælum enim os tuum ponis: De-  
um Patrum nostrorum per latus Iesuitarũ repræhendis,  
qui tabernaculum byssinum, vestes purpureas, templum  
cedrinum, vasa aurea, quadrangulum præcioso lapide  
distinctum; Sardio, Topazio, Smaragdo, Carbunculo  
parari ad



parari ad honorem suum præcepit. Dauidis quoq; auctoritatem eleuas, qui sibi laudi gloriaq; duxit, quod decorum domus Dei dilexerit. & Paulo notam iniustam iniuris, qui omnia in Ecclesia Dei fieri vult ordinatè.

*quod Iesuitas Gabaonitas vocas.* Infatiabilis est maledicendi cupiditas. Sed hîc quoq; crede mihi, causæ tuæ sanguinem mittam. Nimis infans es in rebus Euangelicorû tuorum. Dicam ego tibi ex illorum sententia, qui sunt veri Gabaonitæ; Luterani & Calviniani. Cum enim Trideistę surrexissent, (quorû in patria nostra Prothomagister Gregorius, Paulus Brzeziniensis Valentini Gentilis discipulus extitit) accusareq; Luteranos simul & Calvinianos cœpissent, quòd quendam Deum Trinitatem colerent; quòd *δμοῶσιον* adorarent, quòd personas in Deo, naturas, Substantias, Hypostasas, processiones & emanationes præter scripturam & contra scripturam fingerent. Illi verò ipsa nomina his ipsis verbis scripta, ostendere accusatoribus suis in scripturis Canonicis non possent; ad Patres, Concilia, antiquitatem, vniuersitatem, receptum in omni Ecclesia sensum & consensum recurrebant, & illorum auctoritate fidem Trinitatis defendebant. At Trideistæ; Verusti sunt (dicebant) isti panni, quos vos primi lacerastis in aliis articulis fidei. Gabaonitarû sunt isti exoleti sacci, vtresq; obsoleti, & lacerata iam dudû calciamëta.

*quod Germania incendium: Antuerpia direptionem: Anglia Regiam veneno & insidiis petitam: scotiae Reginam indignissimo mortis genere sublatam Iesuitis tribuis: quasi omnibus in locis motus excitauerint, clasticumq; cecinerint.* Tua sunt hæc, mi adolescens, non veritatis verba. Sed soluam & hoc. Graue est debere cui nolis. Accipe; Germaniam Lutherus & Pacimōtanus perturbauit; Galliam Calvinus & Beza, Flandriam Spangenbergius, Angliam Martyr & Bucerus, Scotiam Buchananus, Transyluaniam Blandrata, Poloniam Sarnicius & Sarnicius. Si isti Iesuitæ fuerunt & non Iesuitarum hostes; & persecutores teterrimi; hoc primum erit in



omni tua actione verum verbum, quod dixisti. Ferendo, non inferendo iniurias ista Regna peruaferunt Iesuitæ. nec solum eam vim timuerunt nunquam, quæ ad corpus vitamq; peruenit; sed nec eam quæ periculo mortis iniecto, animum formidine perterritum loco sæpè, & certo de statu dimouet. Non eos, crede mihi, rotæ vestræ, non radij, non vngulæ, non rotabula, non lebetes, non Castæ, non Catapultæ, non frixoria, non digitoria, non pugillaria, non manus ferreæ, non subulæ, non succensoria, non ollæ æneæ, non sartago, non cruces, non scorpiones, non gladij, non equulei, non mille crudelitatis & acerbitalis genera (nil enim in vestra persecutione defuit, quod vel auribus, vel oculis posset terrorem incutere, quæ in theatro crudelitatum vestrarum, Liber Antuerpiensis ostendit) retardare potuerunt, quo minùs in obseruatione fixi consilij perdurarent, Deiq; vobis annunciarent voluntatem. Et tamen vobis vim fieri vociferamini, cum vbiq; ita eos enecatis, non odij solum, sed etiam ludibrij causa. vt & spatium crucibus deesse, & corporibus cruces videantur. Crocodili sunt istæ lachrymæ. Tollat te, qui non nouit.

*Progrederis longius, & sapientissimum ac fortissimum Regem Stephanum ijsdem Gabaonitarum (Iesuitas intelligit) procellis & fluctibus ita abreptum vociferaris, vt nisi postea consiliũ & moderationem adhibuisset, cum Riga nobis & Rege Suetiæ, aut certè Dania bellum fuisset susceptum.*

Aiacem te mente motum dixeram, futurum putans vt odium tuum in vniuersam Christi Ecclesiam solis Iesuitis flagellandis exsaturares; nunc te vocare ad pileum video etiam Reges. Fortè, sicut Ajax inter Græcos arietem vt Vlysses; sic tu inter orthodoxos, Regem tibi Stephanum, vt magni Gregis Ducem, calumniis & contumeliis vexandum suscepisti. Quo nomine vereor qui te non amauerit, ne lutulentum suem, qui etiam oderit, ne Cerberum tricipitem putet. Durum quod dolet vt non doleat, ita tibi libet, cum omni mortalium genere volu-  
tari, ita



tari: ita volupe est ad omnia adlarrare. quamuis non est hic larratus; sed morsus. Non queo diutius linguæ tuæ procacitatem tolerare. Ipse quoq;

*Iupiter, linguæ petulantis odit  
Glorias.*

Quamobrem vt Homerus loquitur;

*Μοί δ' ἐγὼ ἀντίος εἶμι καὶ εἰ πυγῇ χεῖρας ἔοικεν ;  
εἰ πυγῇ χεῖρας ἔοικε, μένος δ' ἀίδωσι σιδ' ἴρω.*

*Tibi ego contrarius vado & si igni manus similes essent :  
si igni manus similes essent, robur autem ardenti ferro.*

Tu furiis abreptus: tu fluctibus obrutus: Tu procellis implicatus: Tu Megæræ facibus accensus; Tu Cacodæmonis audacia armatus, audes notam incogitantis minimeq; meditati consilii ei Regi affingere, cui orbis vniuersus isto nostro seculo primas sapientiæ & fortitudinis partes tribuit? Audi Socolouium eius Academia, pro qua te pugnare simulas, olim alumnum & professorem; nunc vniuersæ patriæ præcipuum ornamentum, de Rege Stephano quasi omnium ore loquentem. Fuit ille in Ecclesia Dei plusquam sacerdos: in Repub. plusquam Rex: in exercitu plusquam Imperator: in acie plusquam miles, in iudicio plusquam Iurisconsultus: in dicendis sententiis, plusquam Senator: in aduersis ferendis, plusquam vir: in publica tuenda libertate plusquam ciuis: in amicitiiis colendis plusquam amicus: in conuictu, plusquam familiaris: in venatione plusquam Leo. Si sacerdotem procellis abreptum, si Regem fluctibus oppressum, si Imperatorem timidum; si Senatorem, consilii inopem; si virum, viribus carentem, Regem Stephanum putas; non contendam cum tua pertinacia. Facilius enim te, quisquis sapit à, dæmone obsessum iudicabit, quã Regem Stephanum, manu & consilio fortẽ negabit. Vtinam autem in animos minus obstinatos optimi Regis conatus incidissent. Rebellionis periculum denuncias, si sedem Iesuitæ Rigæ fixissent. Sed quid quæso te? Iesuitæ Ge-



dani fuerunt, cum Euangelici arma parricidialia in illum  
ipsum Regem & dominum suum ceperunt? Quis ad eos  
Iesuita, quis Monachus facem in ciuitatem intulit? Quis  
Episcopus ad rebellionem armauit? Id quidem tu non  
solum de Sacerdote, sed ne de vilo Catholico homine  
affirmare poteris, etiamsi sis impudentissimus. Euange-  
lici fuerunt & qui suaserunt, & qui bellum susceperunt.  
Nec enim fieri potest, *VT DEO REBELLES, REGI  
SINT FIDELLES.* Aiunt Hosium Cardinalem saepe dice-  
re solitum: Qui non est Papista; non est Regista. De ha-  
reticis dixit olim Martianus, non de Catholicis, quod ma-  
le parent Regibus suis. Catholici Petro praecceptore, &  
bonis obedire consueuerunt & discolis. illorum bonita-  
te ad consolationem vtuntur; istorum perueritate ad pro-  
bationem. pro vtrisque Deum deprecantur. Quis Iesuita  
Albertum in Prussia Principem in Regem Sigismundum  
primum armauit? Quis Archiepiscopum Rigensem in Si-  
gismundum secundum incendit? Nonne Euangelici Ma-  
gistri & ministri? Quis turbas Derpati suscitauit? Quis  
Moscos ad illius obsidionem, atque ad totius Liuaniae va-  
stationem e propriis sedibus exciuit? Nonne Wittem-  
bergenfis ille pellio scelerati Magistri Lutheri pessimus  
discipulus. Non Iesuitarum illa sunt; sed Euangelicorum  
Epiphonemata: Euangelium sitit sanguinem. Et illud;  
Venit tempus, cum sacrificium Deo placatum fiet ex ca-  
pitibus Monachorum bibere. Addam aliquid de Scotia.  
Ministri fuerunt Haeretici, non Iesuitae Catholici, qui Re-  
gem & Reginam domi consilio, foris; omnibus castris &  
armis oppugnarunt, qui publice decretis eorum in foro  
Edenburgenfi resisterunt. Vis nomina adam? Robertus  
Pontus, & Gualterus Bacanquelus a Iacobo Lausonio ir-  
ritati. Ministri fuerunt in Flandria toti terrarum orbi  
conspiciendi, qui legitimae potestati resistendum docue-  
runt. Ministri in Gallia, qui in ccedem Regis & Reginae  
succariorum manus armauerunt & audaciam aluerunt.  
Scis quid



Scis quid factum de Riga, deq; Dantisco fuisset, si quid  
ibi Iesuitæ potuissent. Non ex triente aut quincunce, sed  
Regio suo iure Rex in eos vteretur. Non ex semisse vel do-  
drante, sed ex asse ciuitates illas possideremus.

*quod tumultus vtilnenses, perturbationumq; procellas, & ciuium atq;  
nobilium concursum ad præliū cōmittendum, à Iesuitis suscitatas memoras.*

Hoc nemo alius, Deum timens dixit vnquam, præter  
te. Sed video quid velles. Euāgelicis in Catholicos gras-  
fandi sæuendiq; liberam potestatem; Catholicis ne pro-  
prij quidem ruendi capitis facultatem relictam, velles.

*Ais deinde: conspiratione facta, cuius Iesuita autores atq; duces  
extiterunt, magna vi atq; impetu in eam domum irruunt (Catholici) que  
vna in tota vrbe monumentum antiquitatis extat. Lutheranis concessa, Rege  
atq; omnibus Senatoribus approbantibus.*

*Ἄπειθε μὴ ψεύθετε, ἐπιστάμεος σάφα εἰπεῖν.*

*Atride (Homericum est) ne mentiaris cum possis vera dicere.*

O indolem impurissimam, (Modestè, non vt meritum  
es ago tecum adolescens. Nam si tibi tuiq; similibus Euā-  
gelicis irascendum esset, non irascendum, sed insanien-  
dum esset) vt animū fartum calumniis exonerare cupis &  
vt mentem mendacijs prægnantem excutere? Equidem  
ita promptus & acutus es, ad omnes calumnias omnibus  
vestigijs persequendas, vt abs te nil aliud expectemus,  
quàm vt affirmes Iesuitas in paradiso serpenti persuasisse,  
vt Euam seducerent: aut Pilato authores extitisse, Chri-  
stum vt in Crucem ageret. Quæ est per Deum hæc tanta  
calumniandi libido? Quæ lacerandæ famæ cupiditas?  
quod intorquendarum calumniarum desiderium? Iam  
vereor, ne & Græcis adfuisse dicas Iesuitas, cum Helenam  
raperent. Nimum sapias Monocule. Nimum sapere, ni-  
mium malum est. Si bonus patriæ tuæ ciuis esses; pacis  
amans & quietis Reipub. vulnera non refricares. Optima  
enim ciuilibus belli defensio; obliuio est. Nemo carus fu-  
rorem illum populi, nemo vim illatam, nemo flammam  
immissas probauit: legum & Regum vinculis ac legitimi



Magistratus autoritate cohiberi illa vestra audacia debuit, qua vobis fas iusque esse voluistis, ipsius Regni statutis prohibita conuenticula agere. Templum contra templum, altare contra altare, cathedram falsitatis contra Cathedram veritatis erigere. quam poenam, vobis nouatoribus Regni statuta irrogant, iam diximus. Extat illa sancta Confoederatio Corczinensis, in qua sese Rex & Senatus & vniuersa Nobilitas obstringit, contra talem, siue tales insurgere ad eorum destructionem, qui errores haereticos in Regno fouere aut manu tenere cuperent. Sed hoc iam ante dictum est. Si Rex, si Senatus, si Equites ad istorum destructionem insurrexissent; plebs non insurrexisset. Sed Sacerdotum est Dei aperire mysteria. Voluit hic quoque Dominus infirma mundi eligere, vt confundat fortia. Voluit ex ore infantium & lactentium laudem suam perficere. qui si & ipsi tacuissent, lapides locuti fuissent, aut suo se quisque loco & ordine mouisset. Sic Dauidi a caede Goliati reuertenti, non equitum turmae; sed muliercularum agmina occurrerunt gratulantium & acclamantium; Saul occidit mille & Dauid decem millia. Sic Hierosolymam ingredienti Christo, non Principes Sacerdotum, non Scribae & Pharisei; sed pueri Hebraeorum occinebant in via; Osanna filio Dauid. Benedictus qui venit in nomine Domini. Sed non est huius tempus sermonis, nec tu diuina potes per aetatis tyrocinium, mente & animo percipere mysteria. Non proiciam Margaritas ante porcos. Tua haec esse aio, non veritatis verba, istiusmodi fulmina a Iesuitico esse nomine profecta. Sed in eo quoque vehementer erras, quod nulla vnquam ante aduentum Iesuitarum talia pericula, ciuibus nostris acciderint. Infantem te dixi; nunc in patria hospitem, & peregrinum affirmo. Nam si aetates & tempora diligenti studio persecutus fuisses, quod dicis non diceres. Vbi gentium fuerunt Iesuitae, cum Academiae Cracouiensis studiosi, in Luteranorum cuneos, in Ducali domo,



domo, vt vocant, Deum blasphemantes irruerant: cùm extincti Hæretici cadauer ad sepulturam deportati excusserant: cum Arrianorum Synagogam vexauerant, libros impios diripuerant: cùm Euangelicorum cadauera exhumata escam volatilibus cœli obiecerunt. Hic profectò effugium inuenies nullum, quàm vt ipsos Academicæ Cracouienfis Professores flabella seditionum appelles, & earum quas ego commemoro, tu ignorabas turbarum & seditionum incentores. Sed ego te docebo adolescens: Neminem esse tibi putes amicum cui tu non es. Vos autem Euangelici cùm sitis omnibus erroribus amici, non potestis non esse nisi solis non errantibus inimici. Miror profectò, ne etiam vngues à natura Leoni datos gaudeatis, vt offendant: manùs homini attributas doleatis; vt defendant. Sed nouum non est Euangelicis, rerum & naturarum ordinem peruertere.

Arma ad extremũ irritas, clausicumq; canis, cùm ais; *Erant quoq; maiores nostri catholici, & tamen arma contra illos Iesuitas cruciferos sumpserant, & eos omni ratione persequendos existimabant, summo Pontifice repugnante, & eius Legatis resistentibus.*

Iam te, video Veritas. iam, vox & ratio, & ipsa deficit oratio. Arma expedis, quando desunt argumenta. Pacem suades, bellum moliris. Altera manu panem; altera tenes lapidem. Id scilicet solenne est Euangelicis Hippocentauris, cùm ratione destituuntur, acre ferrum stringere. vel potius ommissa ratione, manum armis admouere. At tu *μυρμικίας δε νι περὶ ὧν λέων βρυχῶρ*. Formica sanè es, rugias licet vt leo. Narro tibi non fore vobis difficile non repugnantes vincere: Arma Iesuitarum spiritualia sunt, non carnalia. Hoc tamen moneo. Facilius fore Iesuitas perdere quàm vincere. Sed quam tantam acerbiratis causam præbuerunt? *quia, inquis, maiores nostri arma in cruciferos sumpserant, & exiguum sit discrimen inter cruciferos & Iesuitas: inter crucem & Iesum. crux enim & Iesus, eandem propemodum vim habent pietatis & modestæ religionis.*

Sanus



Sanusne es? Vigilasne? Mimi ne, an Oratoris personam sustines? Ludibundus vt video de sanguine ciuium decernis, plane Syllano more. vel sicut olim Herodias in conuiuio petens caput Ioannis Baptistae. Arma in Cruciferos maiores nostri sumpserunt: Quia scilicet Cruciferi maiores nostros armis appetiuerunt: castris oppugnarunt, vrbes exciderunt, agros depopulati sunt, nec ipsos vnquam Reges nostros, pace & ocio frui permiserunt. Id si faciunt Iesuita, ad belli me societatem, pro patriae salute adiungam: signa si voles praferam, calonis etiam munere & officio defungi non dubitabo; dum a ciuium ceruicibus extrema pericula depellantur.

*De Hispanica monarchia, de Religionis custodia, de Regis catholici crudelitate (sic enim tibi libet blaterare) de misera hominum illorum conditione quae ais.* Tu, vt video, scapularum agis confidentia. Mones te vt caueas, ne Cantaber aliquis audiat, & perticam quaerat. Postquam tuae scapulae virgarum vim virtutemque contempserunt, libenter illi relinquam refurandi, stringendi que tui negotium. Iniquum puto aliis vacare bellis, cum patria vastatur. Te vero valde miserum statuo, cum rerum hoc ipso; quod non sentis quam miser sis. Si Catholicus esses; & Regis Catholici zelum probares, & Inquisitionis necessitatem intelligeres, & subditorum obedientiam, felicitatem potius, quam miseram vitae conditionem vocares. Felix enim (ait Augustinus) necessitas est, quae compellit ad meliora. Sed te ita longe abripit furoris tui & iracundiae impetus, vt cum verum gloriae iter non teneas; Catholicorum Regum & Principum dignitatem & maiestatem, probris & conuitiis vexare gloriosum putes. At nihil profecto aliud assequeris; quam vt qui haec tua legerint, audiuerint, cognouerint; hominem te existiment improbum, conuiuiatorem, maledicum, & vt impurum detractorem detestentur. non virtute & rebus gestis; sed sola linguae petulantia, mentiendi libidine, & dicacitate scurra digna, laudem & nomen quaerentem.

Sed si



Sed si Hispanos improbas, quòd Christo & Regi fident  
feruent, quòd obsequentes & morigeri viuant; Gallos  
certè & Flandros probabis, bella ex bellis ferentes, qui-  
bus semper còtentio grata *πολεμοίτε μάχαιτε*, bellaq; pu-  
gnæq; vt ait Homerus, Sed à minis accedis ad verbera,  
machinasq; muris admoues: & velut ad festorum quan-  
dam solennitatem; sic accedis ad prælia. Equidem lu-  
dere te paulò ante dixeram; nunc video decretum est,  
omnia adijcere vastitati.

Ais enim: *video vos tantis sumptibus, tam firmâ palatia, præsidia  
& propugnacula erigere; que vos Monasteria appellatis, que si verè vt  
sunt nominari debeant; Domicilia scelerum omnium atq; receptacula ap-  
pellari possint.* Tu tuam affirmationem pro fide veritatis ha-  
beri vis; ego impotentis animi argumenta, imò cubilia  
immortalis odij statuo. Domakus es (vt patriæ nostræ  
verbum habet) procacissime Adolefcens. Latinam enim  
& vrbanam appellationem; barbara tua & inurbana, in-  
solens & inhumana actio non meretur.

Posnaniensem tu domum, arcem munitissimam pu-  
tas. Iaroslauense & Lublinense ædificium eiusmodi mu-  
nitionem, tantorumq; præsidiorum arces appellas, vt  
non scholasticos docere: aut muliercularum peccata co-  
gnoscere, sed bellum gerere velle videatur. Tu quidem  
certamen suscepisse videris, vt in singulis periodis impu-  
dentissimo impudentior videaris. atq; ita nequitiam vt  
virtutem ostendere contendis. Quid diceres? quæ ver-  
borum fulmina nō mitteres? si Olomucense Collegium,  
si Augustanum, si Romanum, si Hispanica, si Lusitanica  
Collegia, si Goanas & Mexicanas domos inspexisses.  
Non illi præsidia, non propugnacula erigunt recipiendis  
hostibus idonea; (proditio enim & dubia fides quorum  
esse propria consuevit, iam ostensum est) sed domicilia  
parant ad eas quas profitentur litteras accommodata, &  
iis quos erudiendos suscipiunt, nobilissimis adolefcen-  
tibus consentanea. ad temporis diuturnitatem firma, &



stabilia, & ad ignis & incendij pericula fugienda, lateritia,  
 Non enim in illis heri, quod aiunt, & nudius tertius na-  
 tas fides docent, aut eas quæ cum suis autoribus interi-  
 tum subeunt, (vt subiit Luterana, Muntzerana, Pacimon-  
 tana, & id genus perfidia) sed quæ ea promissione nitun-  
 tur, quam Petro Christus fecisse legitur, cum dixit; Ego  
 rogabo Patrem, vt non deficiat fides tua. Æternæ fidei  
 æterna sunt, aut saltem diuturna domicilia statuenda.  
 qualia statuerunt maiores nostri, optimi & sapientissimi  
 viri, quoties Tempa, Collegia, Monasteria, Cœnobia,  
 Xenodochia, & id genus pietatis & necessitatis domici-  
 lia à fundamentis erexerunt. quibus tu profectò, non bo-  
 nam gratiam habes; si piam eorum æmulationem repræ-  
 hendis, qui maiorum zelum & exemplum imitantur. Te  
 moneo vt memineris, quam sis insolentis dicti tui ratio-  
 nem allaturus, cum te Nobilissimi Equites Lublinensis  
 Collegij autores; Macieiouij, Zebrzidouij, Tencziniij, a-  
 pud fustitudinas, & ferricrepidinas insulas ad virgas &  
 laqueos postulabunt, aut ad adsint ad suspendium.

*quod verò illa ipsa quæ edificant collegia, & monasteria (tu Palatia  
 & propugnacula vocas) domicilia scelerum omnium atq; flagitiorum re-  
 ceptacula appellas.*

Quid iam faciam tibi; vel quid non  
 Faciam! (ait noster Poeta Leopoliens Simonides)

*Ægotem potius quàm ægrotos  
 curem: simplicior enim hæc labes,  
 Dolcas si ægrotes, si ægroto adsis  
 Et menti dolor & manibus labor.*

Collegia Iesuitarum scelerum sunt domicilia? Colle-  
 gia Iesuitarum sunt flagitiorum receptacula? Cina de ca-  
 lamistrata: Frons meretricis facta est tibi. (Malo crudelis  
 in animaduertendo; quàm in prætermittendo dissolutus  
 videri) ne in tam quidem aperta & manifesta calumnia  
 potuisti erubescere? Meritò te viperarum progeniem ap-  
 pellabo, ingratham in parentes, & benefacta malefactis  
 rependen-



rependentem. Os impudens, non es mentitus hominibus; sed Deo, qui in his domibus & collegiis piè colitur. Possunt ne esse Domicilia scelerum, vbi quotidianis precibus numen diuinum placatur, vbi lachrymæ funduntur, vbi ieiunia exercentur, vbi cilicia, vbi flagella, vbi humi cubationes, vbi meditationes, vbi lectiones, vbi conciones, vbi confessions, vbi sacræ Eucharistiæ quotidianæ fiunt distributiones? Possunt ne esse flagitiorum receptacula, vbi in horas prope singulas fiunt conscientiarum examina, vbi silentij custodia, vbi temporis parsimonia, vbi verbum ociosum exulat; sed omnia pietas, humilitas, & mansuetudo, ac super omnia timor Domini occupat. Si cupiditatum carnificinam, si flagitiorum pestem, si frenum furoris, si iuuentutis cippus, si mortem cupiditatum & lasciuarum omnium, Iesuitarum domos dixisses; parum dixisses. Si itaq; calumniarum artifex, si mendaciorum architectus, si conuitorum faber, si totius pietatis & modestiæ hostis teterrimus vocari nõ vis; a de scelerum & flagitiorum exempla, profer autorum nomina, nota loca, signa tempora. Id quidem fat scio tu præstare nunquam poteris, vnde consequens est, vt omnium ab omnibus mendaciorum & calumniarum pater, mater, frater, faber, sator, artifex & opifex habearis. Equidem dubito ne tu fueris illius fabulæ Protomagister, quæ Poloniam vniuersam & ipsam etiam Germaniam peruagata est; Captos fuisse Cracouiæ Iesuitas in crimine pessimo, & in medio foro igne emendatos, optimi & sapientissimi Regis Stephani imperio. At fabula cito in spongiam incubuit, & conficta criminatio apparuit. Extant ea de impressæ Archiepiscopi Moguntini ad Stephanum Regem litteræ, & eius responsum.

Quod ais; *Iesuitas Hispano Regi diuinos cultus tribuere, præsertim si eo accedat Papæ autoritas.* Falsum est. neq; tu id à quoquam vnquam vsquam fictum neq; pictum, neq; scriptum ostēdes. Sciunt Iesuitæ & in omnibus scholis suis docent,



esse quendam Deo soli debitum cultum, quem Iatriam  
Græci vocant, & alium qui mortalibus quoq; sine diuini  
numinis offensione tribuitur, quem *Θουλέια* appellāt. Hu-  
ius generis cultum Regi suo tanquam præcellenti tribu-  
unt, vt illud quod Apostolus præcipit impleant. Deum  
timete, Regem honorificate. & cui honorem; honorem.  
cui tributum, tributum. Sed Ecclesiæ mysteria, factaq;  
Dei narrare auribus indignis horresco. At quàm ti-  
bi volupe est; Principibus Christianis allatrare; omnes  
ex omni parte carpere, mordere, suggillare, quod furen-  
tis & rabiosi Cerberi esse proprium diximus. Papæ ne su-  
am autoritatem adhibebit; vt diuini cultus Hispaniarum  
Regi tribuantur? At ille ne sibi quidem istiusmodi hono-  
res debitos putat; sed Deo soli tribuendos iudicat. Au-  
gustinus certè proprium ac soli Deo debitum cultum vo-  
cat *SACRIFICIUM* adedò vt qui vnquam Principes sibi  
sacrificare iusserunt, per hoc se Deos haberi voluerunt.  
Si ostenderis itaq; quis vnquam non dico Iesuitarum,  
sed qui vnquam fuerunt mortalium, qui vel Papæ vel  
Regi Hispano sacrificauit; te à veritate contra falsitatem  
stare pronuntiabo. Quòd multa in hoc genere præteris,  
bene facis. Te labore; me molestia leuas. Non ita, crede  
mihi, scribis; vt timeamus ne desinas. Nil enim aliud a-  
gis, quàm loquens laceras diem.

*Admones deinde senatores, vt meminerint. Hispaniarum Regem non  
longo à nobis interuallo esse remotum. Antuerpiam à Dantisco sex dierum  
itinere abesse, ficus ex hostico recentes importari, & Hispanica poma ma-  
ioribus nostris incognita, cæterasq; Hispanicas et Italicas delicias in prom-  
ptu haberi. Certè tu non existimasti probare te posse, tui  
similibus quòd esses hostis Ecclesiæ Catholicæ, nisi Regi  
quoq; Catholico esses inimicus. Rectè dixit quidam; Eu-  
angelicorum sectam non odissem, nisi tam turpes animos  
in quibus habitaret, eligeret.*

*Amator patriæ, vindex libertatis, custos legum, spes  
vnica Reipub: quàm tibi volupe est, non solùm Iesuitas,  
sed omnes*



sed omnes etiam Reges & Leges, omnia in vniuersum Re-  
gna & Prouincias, dente canino lacerare? Tu quidem  
videri vis, quasi saluam Rempub. cupias. Ego verò amif-  
sam puto, cum vulneribus suis, tum his consiliis & me-  
dicamentis, quæ isto tuo zelo pietateq; parantur. Vti-  
nam non maius esset patriæ nostræ periculum à tuis E-  
uangelicis Regum & legum euerforibus, qui flam-  
mas omnibus imperiis quoquo se vertūt inferunt: imma,  
summis paria faciunt: & tantò nocent efficacius; quantò  
licentiùs, & liberiùs per omnes Reipub. partes perua-  
gantur. Scit infœlix Gallia, experta est Flandria: tota  
ab istis euerfa iacet Anglia. Sed cur Turcas & Scytas  
præteris? An ab illorum potentia nullum periculū per-  
timescendum putas? An vnus ex illis es, qui cum barba-  
rorum illa colluie fœderis societate contra capita Chri-  
stianorum inierunt? aut fortè Bizantijs in illius comitatu  
fuissti, qui Bassæ persuadere conatus est; Euangelicorum  
fidem non maximo interuallo à Turcico Alcorano dissi-  
dere, eorumq; esse castris & armis muniendam? Non te  
latere potest; Euangelicos fuisse, qui in Comitibus, quæ  
prætereo, particularibus Contributionem ad bellum Tur-  
cicum conferendam negauerunt, ne quid contra sociorū  
& confœderatorū fidem facerent. Iam autem ostensum  
à nobis est, quanta sit fidei, religionisq; inter Euangelicos  
& Alcoranicos consensio. Verum profectò dixit, qui vos  
Turcarum præcursores, seu anteambulones appellauit.

*Carpis deinde quendam plenis velis in Suetiam properantem. Alium  
sexaginta milliaria tribus diebus emetientem. Accusas etiã pacificationem  
sibi non traditam sumentem.* Id quidem tu tanta confidentia  
exaggeras, vt imperitorum inscitiam tua cauillatione de-  
cipias, tibiq; persuades ex his tuis laqueis non euafuros  
Iesuitas, etiamsi pennas sumerent. At non est difficilè  
diuinare quos intelligas. Sed tu profectò nondum videris  
esse assecutus, vel Obedientiæ vim, vel quantam in re-  
bus gerendis habeat vtilitatem celeritas. Tibi enim diei



fortasse breuius conuiuiis; noctis longitudo stupris; & flagitiis conteritur. Nescis Bernardum sanctissimum, cœcam obedientiam à religiosis viris requirere, ne curiosius rimentur cum mittuntur, quæ sint locorum interualla; alterum an istum quem nouimus orbem adire sit necesse: Alpes superare, an Oceanum emetiri, syluas an flumina præteruehi. Fideles sint an infideles: Christiani an Pagan: Schismatici an Hæretici, ad quos eundem est populi. Quò vocat periclitantis salus, quò vrget Christiana charitas, quò Reipub. necessitas impellit, quocunq; mittit legitima potestatis autoritas, infracto eunt animo, nec piratas, nec prædones, nec vrsos, nec leones occurrentes pertimescunt. Si tibi scelus; si vitium est Obedientia; si diligentia, si celeritas, si robur animi, si periculorum contemptio, non contendam cum tua pertinacia. Bache Bachanti, si velis aduersariet (ait ille) ex insana infaniorum facies. Profectò si tu vnquam rectè obedire didicisses, si proximi commodis & vtilitatibus mouerere; meliùs nunc posses his cupiditatibus imperare, quæ te transuersum agunt, deq; statu mentis dimouent, vt virtutem, vitium; obedientiam; infamiam, celeritatem; leuitatem putes.

*Illud verò quod addis quendam sibi non traditam pacificationem sum-*  
*psisse.* Calumnia est. Extant mittentis & præcipientis litteræ, possunt codicilli proferri, ob signatâ tabulâ ostendentur, si pertinax esse perseveraueris.

*De libello contumeliis & maledictis in gentem nostram pleno;* Tu ais; Ego nego. Tu te non explicas; ego non assequor quid repræhendas, nec ex quo te errore eruam. Scio magnam à Iesuitis adhiberi cautionem in libris ædendis, & quicquid in lucem proferendum est, per manus intelligentissimorum hominum, qui iudicij maturitate excellent peruagari, omniumq; ponderum examine ad libram reuocari consueuisse. Sed si patieris me diuinare quid intelligas, Volani tu fortasse Zuinglio Calvinistica succiplenæ cœnæ structoris & pharmacopolæ Lituani libellum



bellum contra Eucharistiam a ditū intelligis. quem cum inter Nobiles ad bellum Moscicum coeuntes spargeret, zelantissimus Rex Stephanus, audaciam Autoris derestatus, in familiari sermone cum eo, quem non nominas doctissimo zelantissimoq; Sacerdote, cupere se ostendit; vt breui libello, quinam esset eius, de qua agebatur, Controuersiae status ostenderet; & antidorum sparso veneno obijceret. id quod sine mora factum. Responsum Rex optimus approbavit; tu contumeliis & maledictis plenu assersis. Sed alia in hoc genere inferius persequemur.

*Quod delicate & suauiter viuant: magnos sibi deberi honores existimant. Magnifici appellari cupiant: omnibus artibus multa praedia colligant, & oppida exigant: Regni senatores opibus superent: ecsq; non tantum contemnere, verum iam ad eodem quosdam & animo & oculis suis & libellis designare incipiant.*

*Ne mihi, ne queso hac in  
turba, exsensos sermones fere;  
qui te mentis captum infament.*

Magna certè est hæc mendaciorū farrago. Adolescentia tua libidinosa, & intemperās hæc te venena cogit fundere, & certè qui semel fines modestiæ est prætergressus; eum gnauiter esse oportet impudentem. Ad singula breuissime respondebo, & ea erit, crede mihi, ex omni æternitate fluens veritas. Si mensas eorum aliquando, si contubernia, si victus rationem oculis ipse tuis inspexisses; aliter sentires. Delicias illi, voluptatesq; vt maleficia vitant. Corpus abstergere mundicijs, probro ducunt. Amictus cultusq; corporis, omnibus in vniuersum par est; cum verò non mutant, nisi vsu longo vetustateq; consumentum. Ad ceenaculum tanquam ad templum conueniunt, vbi gustare quicquam fas cuiquam non est, nisi prius oratione expientur. Cum silentio autem residentibus, condimenti loco lectio sacra recitatur, edendi verò potandiq; modus, non saturitate sed necessitate definitur. Alimentis enim vtuntur vt medicamentis. Binis; ad sum-



num ternis ferculis famem frangunt. In fine refectio-  
nis vota reperunt. Noctis partem quam tu Veneri &  
Libero deberi arbitraris, votis & orationibus tribu-  
unt. Asperiores autem in victu, vestitu, lectuloq; legem  
ordinariam propterea nullam statuunt; vt omni homi-  
num generi, ætati, naturæ, valetudini, tanquam quædam  
communis & æquabilis viuendi ratio sit proposita, ob-  
seruatione facilis. Iracundiæ moderantur, indignatio-  
nem cohibent, quod quis inter eos dixerit: iureiurando  
fortius habent, iusiurandum verò, periurio deterius vitât.  
Mendacij condemnatum arbitrantur; cui sine Deo non  
creditur. Qui cæteris præsumunt; rem indignam Christi  
seruo arbitrantur, abuti viribus potestatis, ad contume-  
liam subiectorum. Sed neq; veste, aut ambitioso ornatu  
reliquis eminent. Deprehensos in peccatis, & spe emen-  
dationis destitutos, à sua congregatione repellunt. & qui  
fuerint ad eum modum reliquorum calculis condemna-  
ti, infelicem vt plurimum vitam agunt; aut indigna mor-  
te consumuntur. Id si putas suauiter delicateq; viuere, ne-  
scio quo nomine luxum, quo diffusis, appellabis. Velles  
fortasse vt sicut Bonzj Iapponensium Deorum, sacrificuli  
papyracea tunica tecti, cum descripta Amidæ vita æta-  
tem agerent, aut vt Synarum Hoxiones Chiam calidam  
haurirent. vel sicut Brasilienses carbonibus subiectis in  
extensa reti cubarent: vel vt Deruisæ Turcici itigmata  
sibi inurerent, aut acutis nouaculis corpus frustatim  
discinderent.

*Ais: Quod magnos sibi honores deberi existimant, & Magnifici  
appellari cupiunt; Ostende mihi Iesuitam honoribus aut di-  
gnitate eminentem Cardinalem, Episcopum, Abbatem,  
Canonicum, & id genus. Ego tibi ostendam, leges eorum  
fixas, quibus sibi scientes & volentes viam intercluserunt  
ad omnes honorum & dignitatum gradus, etiam sponte  
oblatos. De Magnifici titulo apparet te versatum inter  
illos non fuisse. Patres & Fratres illi se inuicem & Socios*

non



non Magnificos appellant. Magnus enim cuiq; honor est integritas sua.

Ais; *omnibus artibus multa prædia colligunt, opibus eminent.*  
Ne tu Codrus omnium egentissimus videris, qui decem aut duodecim prædia, in tanta Regni vastitate à piis attributa, multa vocas: è quorum redditibus puto viuunt non minus personæ 350. Cur etiam Apostolos non accusas, quòd precia possessionum ad pedes proiecta receperunt? Cur non eodem Apostolorum Principem condemnas crimine, quòd ob fraudatum precium; maritum morte multauit & coniugem? Quod præterea addis quosdã Senatores ad cædem designasse animo & oculis; nondum te ita puto effrontem & impudentem, vt de cæde corporis intelligas. Si cædem errorum: Schismatum, hæresum, nequitia & impuritatis intelligis; Herbam trado, tecũq; pronuncio, eos ad eiusmodi cædem non Senatores tantum, sed omnes in vniuersum mortales designasse. vt erroribus omnibus extremam mortiferam plagam imponant; & omnis impietas sempiternum interitum subeat. Sed in eo quoq; toto, quod aiunt, cælo erras; quòd putas nobilissimas Regni familias turpi ignominia notatas, quòd ex illis nonnulli malunt inter Monachos, vt ais, quàm inter Nobiles Patricios viuere. Quæ quæso te res? quæ spes? qui animi motus ad hæc dicenda incitat? Nil vt video prætermittis, vt ineptissimus videare. Auxerunt illi suam familiaq; suæ dignitatem, non minuerunt, cum sese in summi Regis obsequium tradiderunt. Quæso te, Matthæus illis suis opibus & illa sua dignitate relicta Christo se adiungēs, auxit ne an minuit dignitatē? Iozaphat regno relicto, vllamne ignominia notam subiit? Vos appello Nobilissimi Equites Rozrazeuij, vos Varsenicij, vos Visocij, vos Kostka, vos Melecij, vos Radziminij, vos Gawronscij, qui studia vestra soli Christo dedicastis, qui nomina vestra inter Iesuitas retulistis, mentem huic Equiti impetrate meliorem. Profectò is terrenos



Reges, & Principes Deo omnipotenti præferendos putat, ita, vt laudes & præmia consequatur & familiam illustret, qui Regi; vituperium autem, ignominiam, turpitudinem subeat qui Deo soli se addixerit. Caue ne tibi infamiae actionem Nobilissimæ familiæ intentent, aut ad pœnam talionis (penè dixeram Tantali, quam sat scio adolescentiæ tuæ futuram fuisse grauissimam) condemneris. Non erit tibi difficile, ob tua mendacia, conuitia, maledicta, infamiae notam inurere, & ignobilem, si modo is es quem teipsum facis, pronunciare, & è Regni finibus ad exilium condemnare. nil enim te prorsus delectare videtur, quod aut per naturam fas sit; aut per leges liceat. Sed spero, vt primùm per ætatem iudicium facere poteris, aliter senties.

*Garris præterea cùm ais; sacerdotes atate & morbo cōfectos, sedibus suis eiectos: villas Parochorum ereptas: Nobiles exterminatos: opimas & fertiles Ruthenia partes inuasas, viduas bona relinquere coactas, hæredes patrimonio priuatos, patriam violatam.*

Ad hæc tua tam crassa mendacia præ dolore, oculum, crede mihi, lachryma perpluit. ita me piget pudetq; stultitiæ temeritatisq; tuæ.

Sed si hæc omnia quæ dicis, ita vt dicis, patrant & designant Iesuitæ, cùm ita sis in calumniis iaciendis intemperantissimus; puto non futurum te fuisse temperantiozem, in tam multis & acerbis iniuriis à sociorum capitibus depellendis. Ferrum primus fringeres, clientelas cogeres, omnia in oppressores Iesuitas armares. Paulò ante libellum æditum dolebas, plenum contumeliarum in gentem nostram, ex quo exterarum nationum homines, existimare possint, nullam in patria nostra esse pietatem, nullam rationem, nullam virtutem, nullum ordinem. At quid te teipso esse potest in tuam patriam contumeliosius? in qua ais, vim viris, vim fœminis, vim viduis, vim pupillis, vim liberis, vim hæredibus, vim Parochis, vim Sacerdotibus sine freno furoris inferri. Ali-  
ter res



ter res ipsa, aliter per Dei gratiam loquitur veritas. Mihi quidem istum concursum plorantium, ac tempestatem publicarum querelarum videre nunquam licuit. Adest Rex Serenissimus Sigismundus Princeps, Deum timens (maiores Principis laudem non inuenio) innocentium omnium & viduarum & pupillorum, tutorum & Sacerdotum acerrimus defensor. Adest sapientissimus Senatus, fixa sunt tribunalia, patent subsellia, libera sunt iudicia, neque tamen in illis actiones vllæ de vi, & iniuria Iesuitis intentatæ audiuntur, non leguntur, non videntur. Quæ te res purum purum calumniatorem & conuictatorem conuincit; & patriam vniuersam ea quam illi affingis nota liberat. Cur enim secures datæ? Cur excitata tribunalia? cur præsidet iudex? cur carcer ædificatus? cur tot supplicia in raptos & oppressores confutata? Aliter viri boni tibi dissimiles, de statu & conditione patriæ nostræ loquuntur. Est in ea (sit Dominus benedictus) iustitiæ locus: sunt virtuti præmia proposita: sunt descriptæ sceleribus pœnæ: est sui Senatus similis. In deliberationibus centum; in sententiis vnum videres: stant fixæ maiorum nostrorum leges: Iudicum integritas incorrupta: distrahendarum controuersiarum ratio expedita: libertas in dicendis sententiis impunita: scelerum animaduersio parata, verborum lenocinia suspecta, ambitionis studia languida, pecuniæ sitis moderata, pactorum & Conuentorum fides maxima; Amicorum inter amicos consensus fidissima; inimicitia mortales, Amicitia immortales, similitates remissæ, bona fide reditur in gratiam, Coniurationis, proditionis, veneni nomina prodigij loco ducuntur. Populi in vniuersum, natura fortes, armis nati, & simplicis veritatis amici. nec aliam ob rem fortasse infœlicitate digni, quàm quòd Evangelicorum progeniem, qua perturbantur ac modo non euertuntur omnia in patriæ visceribus, tolerant. Nisi enim vos essetis Evangelici, qui patriæ pacem, Regni



Maieſtatem, Regis authoritarem, iudicum integritatē au-  
dacia & impudentia veſtra perderetis; integra Deo, ſal-  
ua Eccleſiæ, tuta Reipub. eſſent omnia.

Ais deinde; *ſtephanus Rex adiurauit ſe omni ratione pacem eſſe  
conſeruaturum inter eos, quorum in religione ſunt diſcrepantes ſententiæ,  
quamobrē igitur homines noui & peregrini in regnū noſtrū ſunt recepti?*

Equidem apparet multas te in Euangelicorum ſcholis  
ferulas contriuiſſe: ita omnes illorum artes perbibifti, vt  
ſcurras omnes dicacitate tua ſuperare voluiſſe videaris.  
Iam de reliqua noſtra cogitatione cognoſce. Solenne eſt  
Euangelicis ex ſcriptura non ſcripturam; ex non ſcri-  
ptura ſcripturam facere. Tu quas vis, quaſq; libet leges  
in patria fixas eſſe vis, quas non libet iugulas. Corczi-  
nenſem illam Conſederationem ſanctiſſimam, qua vos  
hæretici ad cædem & deſtructionem poſtulamini, vt Ma-  
cedonum caſtra refugis: & quicquid illud eſt, quod de  
pace Religionis apud Warſzauiam Interregni tempore  
ſcriptum eſt, ſanctum eſſe iubes. At nos dicimus, illam  
quam vos Conſederationem vocatis, magis iratorum  
hominum ſtudia, quàm conſans Senatus conſiliū fuiſſe.  
An non audiuiſti, qui contra illam Orthodoxorum ſtre-  
pitus, qui Eccleſiaſticorum fremitus, quæ Maſouiorum  
Catholicifſimorum proteſtationes & denunciationes  
extiterunt? Vidimus in Comitibus Coronationis eius quæ  
nobis ſceliciſſimè imperat, Sigismundi tertij Regis po-  
tentifſimi multorum Senatorum manus. Vidimus eorū  
Nunciorum, quos terreſtres vocamus, ex decem Regni  
Prouincijs ſeu Palatinatibus ſubſcriptiones, quibus ſe  
pro antiquis patriæ legibus, contra Conſederationem  
illam nouam, Interregni tempore, ſublato metu poteſta-  
tis, contra omnes leges, (ſic enim dicebant) & quaſi capta  
Republica, caſtris & armis tentatam, incifam per vim,  
impoſitam per audaciam, nullo ſcriptæ more, ſtare proſi-  
tebantur. Sed patiare me hoc tempore in tuam ſenten-  
tiam deſcendere. Si pax eſſe debet omnibus Lutericolis  
& Calui-



& Caluincolis & Volanicolis, & Biefagicolis, & Budne-  
 icolis, & aliis similibus quos colitis idolis. Cur pax esse  
 non debet Christicolis Iesuitis? Si patet accessus exter-  
 nis non hominibus, sed hominum monstris, Strancaris,  
 Ochinis, Lismaninis, Vigandis, Blandratis, Socinis, Ri-  
 baldis, & nescio quibus Caluini & Bezæ Helueticis Sy-  
 nagonistis, quos se in patriam submisisse gloriantur, quos  
 certè nō solum religionis iudices, sed nec socios ad epu-  
 las, nec hospites in domo habere quisquam vellet, scele-  
 rum magnitudine, & conscientia maleficiorum cooper-  
 tos; cur non debuit patere viris optimis & doctissimis,  
 Sonnierio Hispano, Arturo Anglo, Campano Italo, Ro-  
 berto Scoto, Stephano Vngaro Societatis eius quam di-  
 laudas (vituperari enim Catholicum ab Hæretico laus  
 est) Sacerdotibus? Illi sunt, crede mihi, non enim te fal-  
 lo. sic Christum mihi in illa die propitium precor, non te  
 fallo. Illi sunt, non Iesuitæ, qui quotidiana serunt discor-  
 diarum, bellorum ciuiliū inter nos & contra nos semi-  
 na. ita etiam viuunt, vt cuticulam suam curent, pecuni-  
 am colligant, quicquid est pretiosi in alicuius Equitis  
 domo, illud ad se pertrahant, in fraude & ex fraude vi-  
 uant. Cur inquam istæ in patriam receptæ sunt pestes?  
 cur Confœderationis præsidio & tutela muniuntur? Ie-  
 suitæ Orthodoxi, Catholici, Papistæ violantur. Ni-  
 mis tibi sumis adolescens, oblitus es ætatis tuæ; In-  
 temperantiùs hac tua lingua abuteris & calamo, dum ad  
 te putas legum interpretationem pertinere. vt ij quos tu  
 voles, legis præsidio gaudeant, quos nolis & censoria  
 tua virgula miniatq; cerula confixeris, non gaudeant.  
 Nimis etiam ingratus es, iniustusq; ciuis, qui cum te scias  
 armorum pœnarumq; periculo liberatum, armatum ta-  
 men in reliquos ciues animum retines. Scis cui magnus  
 ille Cromerus Confœderationem hanc similem volebat;  
**Dem Smeherwagen**; sic enim loquebatur. hoc est picis  
 seu cuipiam pinguedini, qua curruum axes inunguntur:



Quatuor scilicet rotæ, quatuor sunt huius seculi præcipuæ sectæ; Lutheristæ, Calvinistæ, Trideistæ, Anabaptistæ, quæ si Confederationis lenitate inungantur, cito eo perueniunt, vbi fiunt Atheistæ. Accipe exemplum quod olim hæreticorum vestri similium audacia ob impunitatem processit. Res horrenda dictu; sed expedit vobis audire, quod auditum non possitis non damnare. Narrat Epiphanius, Gnosticos Hæreticos ante suam Synaxim promiscuos, concubitus exercere consueuisse, liberorum tamen generationem vehementer auersatos. Sed si præter sententiam accidisset, vt prægnans mulier efficeretur, detractū quacunq; ratione ex vtero fœtum, in mortario quodam pistillo tundebant, & admixto melle & pipere & aliis quibusdam aromatibus & vnguētis ad auertendam nauseam, omnes fiebant participes contusi pueri, atq; sic humanæ carnis esu peracto preces deinde fundebant ad Deum. & hoc perfectum Pascha dicebant. Horruisti, sat scio, sed eadem fuit & est vbiq; Hæreticorū rabies. constat sibi omnibus in locis illorum impudentia. Si nihil eiusmodi apud vos adhuc accidit, accidet nisi vestra audacia legum ac pœnarum vinculis constringatur. O si videri posset oculis corporis hæc immanitas, & crudelitas vestra, qua Corpus Christi mysticum, quod est Ecclesia, in mille minutissimas partes, ausi estis conscindere; ipsi profectò miraremini quomodo terra sub pedibus vestris aperiens os suum vos & socios vestros non deuorauerit. & eam immanitatem, quā in Christi corpus exercetis, longe ea maiorem & immaniozem censeretis, quàm in Corpus infantis admissam à Patribus vestris Gnosticis hæreticis audiistis. Nunc ea leuiora putatis quæ Dei; grauiora hæc quæ diximus, quia mortales oculos offendunt. Sed quid vnquam non ausi sunt hæretici & quid vos non audebitis Euangelici si modo licebit. verum non est huius tempus querela,



Obras patriæ pacem, Reipublicæ tranquillitatem. Hæretici tibi sunt & Schismatici Ecclesiasticorum sanguine iam pridem saginati, proferendi, quocunq; tandem nomine vocentur. qui dum in Regni visceribus hærent, cum errorum omnium sunt amici, vt ante dictū est, nō possunt esse nisi solis non errantibus, hoc est Catholicis Orthodoxis, & vt vos vocatis Papistis inimici. Vidit olim id ipsum Sigismundus Augustus Rex sapientissimus: Vidit etiam prudentissimus Regni Senatus: viderunt Prouinciarum & Nobilitatis Nuntij, in comitijs Parczouien: Quamobrem etiam Decretum saluberrimum promulgauit, vt omnes externi & peregrini Euangelicorum Superintendentes & Ministri, Regno excedere cogentur. quod si fuisset executioni demandatum, hæc quæ vidit mala patria charissima non vidisset. An tu illam legem mortuam putas? nisi quod valdè vereor, vt esse magna possit eius Senatus authoritas, in quo tanta luxuriâ adulescens, sententiam capitis audet in viros bonos pronunciare. deq; bello & pace, deq; commodis & incommodis Reipub. statuere, qui eum Regni statum esse vellet in libertate, quem cæteri vix tollerarent in seruitute.

Progredieris longius, & ais; *Cur non retinetur authoritas concilij illius amplissimi & sacratissimi Lateranensis, quod vetuit, ne in posterum noua aliqua monachorum familia à quoquam instituat?* Tu quidem isto loco acutus videri velles, & aliquid tandem cum authoritate dicere. Sed interim verum est, quod oculis tuis nil lætius possit occurrere, quàm Iesuitarum ruinæ. Omnia colligis, in omnia te vertis, arma ab aduersarijs petere non erubescis, vt Orator magnus videre, qualis si esses, magna cloaca esses, Iane bifrons, Protee leuissime, quas tandem formas induis? Quousq; istum Gygis annulum torques & retorques? Tu Pontificis Decreta contempsisti, cum Iesuitas, quos ille probat, odisti. Tu maiestatem eius irrifisti, cum illum Regi Catholico Philippo, diuinos honores permisisse aisti. Tu  
Concilium



Concilium Tridentinum neglexisti, cum ab illo Societatem probatam improbasti; & nunc ad Concilium Lateranense recurris, in eoq; tuæ præsidium libidinis statuis. Ego verò tibi dico Gabaonita, vetusti sunt isti panni, quos vos primi lacerastis in aliis articulis fidei, cum omnium simul Conciliorum & Decretorum fidem & auctoritatem eleuastis. Sed tu, quod Euangelicorum proprium esse dixit Vincentius Lirinensis, prima taces, extrema ponis, media præteris, omnia inuoluis, de scriptura ludum, de scriptura tibi Proteum facis: oblitus quod pulchrè scriptum Tertull: reliquit. Sicut si in tibiam flaueris, non propterea hominè tibiam feceris, quanquã de anima tua flaueris; ita si verba Concilij, Canonicaq; decreta flaueris, non propterea seruos Dei damnaueris.

Fili Sathanæ (nam & ipse è Scripturis Scripturarum authorem Christum oppugnabat) video quòd non intelligis, quàm difficile est Dei seruos expugnare, cum nullum certum habeas Deum. quo nomine nullam tibi penam acerbiorè deponco, quàm vt aliquando tamen intelligas, quàm viris bonis nocere contendas. Si posset hæc tua ætas rerum grauitatem sustinere, audires ex me, quòd non solùm Lateranense Concilium sub Innocentio tertio, sed etiam Lugdunense sub Gregorio decimo reposita cõstitutione districtiùs inhihet; (sic enim legimus) Ne aliquis de cætero nouum ordinem aut Religionem adinueniat, vel habitum nouæ religionis assumat; cæterum tu, quæ sequuntur, hæreticorum more præteris. In eodem enim ipso Gregorij decreto illæ Religiones perpetuæ prohibitioni subiiciuntur, & quatenus processerant reuocantur, quæ nullam approbationem Sedis Apostolicæ meruerunt. At IESU Societas non vnius sed quinque Pontificum Romanorum approbationem meruit, quod iam antea audiisti. Sed ipsius etiam Generalis Concilij Tridentini auctoritate firmata est & constabilita. Multa tibi vt video sunt dediscenda, omnia discenda.

que de



*Quæ de dubia sexti Pontificis in societatem voluntate tricaris ; Id*  
facis, nō quòd verum putes, sed quòd impudentia abundes. Iratis animis quodcūq; occurrit, telum est. Gratulor quòd sic habeas omnia explorata. fortè nec illud ignoras, quomodo Iupiter Iunonem duxerit. Iste quoq; Spiritus non nisi Euangelicorum est, qui sese in Dei consilium admissos, & intimæ voluntatis interpretes & Internuncios arbitrantur. Platoni certè iocari videtur, qui se omnia scire profiteretur. Sed hoc tibi persuadeas velim; ita Iesuitas esse legitimæ potestati obsequentes, vt quid Pontifici, quem Christi vicarium agnoscunt. visum fuerit ad Societatis conseruationem adiungere, vocem eius, tanquā Christi loquentis vocem, audiant. tum quòd ita Christianos omnes, qui se modo eos esse meminissent, affectos esse oporteat; tum quòd fidem & obedientiam suam Romano Pontifici non vulgari illo modo, neq; solita ratione; sed præcipua quadam pietate, & deuotione, quod tu fortasse nesciuisti, obstringunt. Ego verò existimo etiamsi verum esset quod prædicas; quòd immortale tuum in seruos Dei odium rabiemq; tricipitis Cerberi, ne hoc quidē quod dicis exsaturaret. Omnium tu vnus cruce spectare in eadem arca velles. cum puluisculo, quod aiunt, euersam, extinctam, è rebus humanis sublatam Societatem cuperes, vt gubernatore sublato, sicut de Romano Pontifice loquitur Hieronymus, facilius in Ecclesiæ naufragio tu & tui Euangelici grassentur. Sed aliter Ecclesiæ sponsæ suæ Deus prouidit, dedit militem qui vidit hostem: dedit custodem qui vidit furem. Nihil est mali (ait Cicero) canes ibi quamplurimos esse, vbi permulti fures. multa obseruanda multaq; seruanda sunt. Non sit fortissimus & sapientissimus Rex Stephanus, (sed hinc tu quoq; fluctibus abreptū vociferaberis, homo abrepticie) qui tantum præsidium constitutum putabat ad Reipub: tranquillitatem, in rectè instituta iuuentute, atq; ad omnē moderationem conformata; vt, quod ante quoq; dictum est, magnis



est, magnis propositis præmiis, viros doctissimos ex in-  
tima Italia euocaret, Marcum Antonium Muretum,  
Flamminium Nobilium, Sigonium, Vrsinum, & Fogle-  
tam, Historicos, Gregorium de Valentia, Tolertum, Be-  
larminum, Iesuitas, Patrem Aquarium Dominicanum  
Theologum. Tu ais monachos instituentem iuuentuti in-  
commodos, at Rex magnus aliter. qui laborem veniendi  
fortasse suscepissent, nisi istos tuos & tui similitum Scyticos  
fremitus contra alienigenas & externos cognouissent.  
Neque tamen propterea deesse Rex optimus utilitati sub-  
ditorum voluit, sed illi ipsi iuuentuti Albenſe & Claudi-  
opolitanum, & Varadinense in Transyluania, Rigense &  
Derpatense in Liuania, Polocense in Lituania, Collegia  
erexit, in quibus tenera subditorum ætas ad omne officij  
munus Iesuitarum studio & opera formaretur. Parum  
est. Vide quæſo te vim desiderij incredibilem, cum cæte-  
ris omnibus in iuuanda re Christiana satis superque fecis-  
set, sibi ipsi satisfactum non putabat, nisi etiam in sepulchro,  
ea qua liceret ratione rei Christianæ succurreret. Testa-  
mentum conscripsit, plenum in rem Christianam & in  
ipſos Iesuitas amicissimæ voluntatis. cuius particulam  
ex me si audieris, saxeum te putabo, nisi nobis diuinam  
aliquam cecineris Palinodiam. Ait ille. At nisi Dominus  
custodierit ciuitatem, frustra vigilat qui custodiunt eam.  
proinde ipsum Principem Sigismundum, omnes denique  
Senatores, status & ordines Regni Transyluanie oro &  
obtestor, per salutem animarum suarum, Reipublice tran-  
quillitatem, simultates deponant, pietatem colant, aui-  
tam sanctam Catholicam fidem recolant, aut saltem per  
me fratremque meum introductam postliminio æquo ani-  
mo ferant. Collegium Iesuitarum in Kolozwar & Ko-  
losmonostor fundatum bonisque dotatum, partim iure  
Regio, partim pecunia & aliorum bonorum permutatio-  
ne, bono iure acquisitum tueantur, conseruent & auge-  
ant. Sic etiam Albenſe, Varadinense, non solum conseruent;  
sed auge-



sed augeant, ad ipsumq; incrementum adijciant. Alio-  
qui si violentas iniicient manus, implebunt modios irę di-  
uinę, qui retribuit talibus secundum immunditiam cor-  
dis eorum. O diuinum diuini Regis testimonium! ô me-  
morię suę in Societatem voluntatis sempiternam! Sta-  
bunt hæc & in arce locabuntur. Tu & Actio tua prima  
& secunda & tertia, & quotquot voles scribere, in Saturni  
podice submergętur. Tu tamen Osce lepidissime in tanti  
Regis exemplo & autoritate audes ludere? non miror.  
Ducebatur olim Athenis ad suppliciũ Aristides, cui quis-  
quis occurrebat deiciebat oculos & ingemiscebat, non  
tanquam in hominem iustum; sed tanquam in ipsam iusti-  
tiam animaduerneretur. inuentus est tamen qui faciem  
innocentis conspueret. Deinceps te moneo ne tam im-  
probę oscites. non est hoc promere verba; sed projicere.  
Non magis contemni putes Regem Stephanum mortu-  
um, cum illustria Principis facta dente canino laceras;  
quã cum ædium Sacrarum ruina calcantur. quas, qui-  
cunq; sunt religiosi, æquę ac stantes adorant.

*Porro illorum qui sceptrā tenent*

*Haud quaquam est violanda autoritas.*

*si magnus vir cecidit, magnus iacuit. inquit ille.*

Nisi quod te iam dudum spontanea perdidit ira. Quid  
de reliquis orbis Christiani Regibus & Principibus di-  
cam, quorum tu nunc os & oculos erubesceres. Quod ma-  
gis illi Regnorum suorum pacem amabant, quod magis  
populorum salutem & quietem appetebant; eod magis  
IESU Societatem, ac alios viros doctissimos omni offi-  
cio, ac pietate & liberalitate in suas ditiones euocabant,  
fouebant, ornabant. Aude inuictissimo & sapientissimo  
Cæsari Carolo Quinto notam præcipitis cõsiliĩ inurere,  
qui Panormitanum Collegium exædificauit, in Sicilia.  
Aude fratri eius Ferdinando; qui Viennense, Pragense, &  
Oenopontanum erexit. Aude Ioanni tertio, Sebastiano  
& Henrico Lusitanæ Regibus exprobrare; qui Coimbric-  
ense,



cenſe, Vlyſſiponenſe, Gôenſe, Iaponenſe etiam & Braſili-  
enſe in India excitant. Facilius profectò efficies, vt te  
qui audierint, mancipium flagris natum putent, quàm  
tantos Principes imprudentes. Non commemorabo  
Carolum Archiducem Sereniſſimum, Gracèſis Collegij  
authorem. Nil dicam de Magdalena Sereniſſima ſorore  
eius; quæ Hallenſe erexit. Nil dicam de Bauariæ Princi-  
pe Catholiciſſimo; qui Monachienſe & Ingolſtradienſe.  
Nil de Philiberto Sabaudia Duce, qui Taurinèſe & Chi-  
amberenſe. Nil de Florentinis, Ferrarièſi. Mantuanis,  
Parmenſibus, Lottaringis, Guiſiis, Niuernenſibus, Nie-  
ſuienſibus Ducibus, & Collegiis afferam, res ipſa lo-  
quitur. Quæ ſi non vides talpa es: ſi vides & vituperas;  
ſcurra es: ſi vituperas & non erubescis; iniquus, impius,  
& conſccleratus detractor es. Dies me deficeret, ſi Prin-  
cipes Eccleſiaſticos Societatis & Collegiorum authores  
& fautores enumerare vellem. Fernèſius nunquam ſatis  
laudatus Cardinalis, Collegium in monte Regali in Sici-  
lia; Romæ verò magnificentiſſimum templum Societati  
erexit. Otto Truchſes, Atlas ille Religionis in Germania  
Dilingæ, Turnoneſi Turnoni, Lottaringus Muſſiponti.  
Boromeus Mediolani, Corneus Peruſiæ, Hoſius Brauns-  
bergæ. Deinde verò & ipſi S. R. Imperij Electores & Ar-  
chiepiſcopi Eccleſiaſtici, Moguntinus Mogütia, Treue-  
renſis Treueris, Toletanus Toleti, Granatenſis Granatæ,  
Gneznenſis Kalifſij. Hos ponè ſequuntur Epifcopi & pie-  
tate & prudentia commemorandi. Noſcouius Pultouia.  
Valerianus Vilnæ. Konarſki Poſnania, alij alibi. Sed nec  
priuati Nobiles deſunt. Paicecus Villaretanum in Hi-  
ſpaniis. Lublinenſe quorum opibus ſurrexerit, non igno-  
ras. Sed nec matronas Nobiles præteribo. Barchinoneſi.  
Maria Mariques de Lara. Complutenſe, Maria Mendo-  
zia. Villagarzinum Magdalena Viloa. Iaroflauieſi Sophia  
Palatina Sendomirièſis excitauit. Quæ tu me iſto loco  
quibus ex cauſis cōmemorare putabis; tùm vt intelligas  
(ſi modo



( si modo per animi angustias potes ) magnā te & diffi-  
lem causam suscepisse repræhendendi eius consilij, quod  
summi Consilij Cæsares, fortissimi Reges, sanctissimi  
Cardinales, intelligentissimi Principes, Deo dilecti Epi-  
scopi, cordati Nobiles, Matronæ deuotissimæ, pro sub-  
ditorum vtilitate susceperunt . & quæ à pietate Societa-  
tis expectabant, vera esse exitu probauerunt : & in eorum  
potius authoritate, quàm in tuo errore conquiescas ; tum  
vt memineris 50000. Nobilium, ad tuam perniciem in  
istorum Collegiis educari, quorum profectò nemo te po-  
terit sine suspirio aspicere : & si quisq; semel conspuerit,  
eris rana Seriphia venustior, nec cuiusuis, crede mihi, a-  
quæ aspersione hæc vnguenta elues. Certum enim est,  
quod qui in vita hominis fidem in Deum sanctissimam  
putat ; non poterit eum æquanimiter tolerare, qui fidem  
ex animis hominum tollere, Ecclesiam Christi scindere,  
ministros eius oppugnare, opprimere, obtruncare, tem-  
pla spoliare ausus sit . Qui pudorem & pudicitiam colit,  
non potest æquo animo, quotidiana Euangelicorū adul-  
teria, Sacrilegia, stupra, incestus, meretriciamq; discipli-  
nam aspicere. & qui proximorum iniuriis, Rerum pub. va-  
stationibus doleat, quomodo potest istos Euangelicos,  
non hominū, sed belli ciuilis vultus, istas fauces, per quas  
non Dominicæ, quod mēdaciter iactitant, sed Lapitharum  
cœnæ & conuiuia transeunt, sine motu mentis relinquere ?  
Qui Romani Pontificis, Episcoporum & Sacerdotū iura,  
dignitatem, libertatem, authoritatē sanctam apud omnes  
haberi vult ; iis quomodo potest non plus etiam quàm  
inimicus esse, qui ad istum ordinem euertendum, ad tol-  
lendā Ecclesiastici imperij maiestatem, opprobria, con-  
uitia, maledicta, verbera, cruces, tormenta, supplicia, fixa  
parataq; se habere gloriantur ? Vellem tibi contingeret,  
vt istorum aliquando vultum & oculos, cum hanc tuam  
Actionem legerint, intuerere. Quoties te mendacem ? quo-  
ties mente captum, quoties inertem, quoties iratum ?



quoties furentē, quoties cœcum & impium appellabunt: quoties per illas ipsas fenestras, quæ legenti lumen ministrabunt deicient optare vt debeas eum quem ædidisti libellum sempiternis tenebris latere; ne stultitię & impudentiæ tuæ extet apud vniuersam posteritatē tam illustre monumentum, Cerrē consideratius consilium suscipere debueras: Cùm olim Deorum delubra Teophilus Alexandriae euerteret, & simulachra in lebetes cõflaret, vnam imaginem certi alicuius Dei omnium turpissimā seruari iussit, eamq; in loco publico erexit, vt Gentiles progrediente tempore, ire inficias non possent se tam turpes & inanimatos Deos coluisse. Hoc porrò Teophili factum Ammonius Grāmaticus Gentilis præ cæteris tulit ægerimè, quòd illa quoq; tam turpis statua constata cum aliis non esset, sed ad Græcorum Religionis irrisionē reseruata maneret. Sic futurū puto, vt te & tuos Euangelicos valde pœniteat extare cum hoc libro tuo in oculis vniuersę posteritatis, stultitiæ & impudentiæ tuę non vestigia sed cubilia. Sed non est difficile diuinare quid metuis. Impendere fortè vides ab hac seruorum Christi acie, his quos seuis Euangelicorum Atheismis interitum. Non enim ira delicatum oculum habere te puto, vt si in eos incurrat Iesuita, statim effluat. Sed hoc agis, hoc conaris, vt pietatem, industriam, diligentiam, litteras, quas saluis Iesuitis proscribere non potes; cum Iesuitis simul eijcias. imò verò hoc agis (fortasse ne tibi mors molesta accideret) ne quid post te in patria integrū, ne leges, ne litterę, ne pietas vlla relinquatur. Velles ante te Rempub. perire. At ista quę suscipis Maximiana sunt & Iuliana consilia, quæ rãtò minus succedent, quantò magis ab illorū abes potestate.

De Maximiano scribit Eusebius, quòd post omnia acerbissima tentata contra Christianos consilia, cùm non quantum vellet cursum fidei Christianæ retardaret, librū conscribi iussit, cui nomen dedit; Acta Pilati, innumeris mendaciis & contumeliis in Christum abundantem, præcepitq;



cepitq; vt Præceptores omnes ac puerorum Magistri discipulis illum suis explicarent, & ipsi discipuli memoriter addicerent, ac impietatem in Deum à prima statim infàtia combiberent. De Iuliano verò his verbis scribit Nicephorus. Ne Christianorum pueri Græcis disciplinis erudirentur, aut Póetas scriptoresq; eorū legerent, scholasuè publicas frequentarent, lege cauit. Ne linguis eorū, inquit, acumine perpolititis, facillè disputatoribus nostris resistere, & sacra quidem sua amplificare, Religionem autem nostram refellere facillè queant. Quæ crudelitatis & impietatis teterrima consilia, si quod opratis tu & rui similes in patriæ viscera inuexeritis; quasi sphæra ad centrum; sic ad Atheismum euoluentur omnia. Luteranismi enim perfectio Atheismus est & Epicureismus. Reliquæ sectæ, quorum numerus ad ducentas fere & quinquaginta ascendit; velut gradus quidam sunt, quibus itur ad impietatis fastigium, vt dicat impius in corde suo; Non est Deus. Nemo enim repente fit summus, ait Bernardus, ascendendo non volando aprahenditur scalæ summitas. Sed ego non perorandi sed respondendi partes suscepi. Hic itaq; respondendi finem faciam, vbi tu finem interrogandi fecisti. Veniet qui tuas calumnias pleno modio verborum refutabit. Interim hic meus sermo erit tibi correctio, si velis; testis autè coram Domino. etiamsi nolis. Vasa iræ, ait August: ad hoc permittuntur in Ecclesia garrire, vt tanquam de negligentia somno excitentur vasa misericordia: & studio respondendi pestilentibus maledictis adhibeant curam salubribus dictis. Et alio loco; Sicut habet suam hilaritatem ipsa cantatio, etiãsi ad eam nemo sua membra mouet, cui pleno gaudio cantatur, ita suum præmium habet admonitio, etiamsi non obtemperat qui monetur. Hieronymus verò planè rem nostram loquitur, cum ait: Qui Ethiopem inuitat ad balneum, etsi nigredinem non auferat illi, pecuniam tamen accipit sibi, & licet in illius candore nõ gaudeat, certè vel in suo lucro lætatur. Sed te



Sed te ad extremum Patria charissima, vosq; sapien-  
tissimi Senatores appellabo, vt istiusmodi Euangelica  
consilia è patriæ finibus in vltimas terras faceffere iubea-  
tis. Nil enim isti siue Euangelici, siue Politici consiliarij  
volunt, quàm vt iterum ad illam barbariem reuoluamur,  
quæ ante susceptam fidem Christianam in patria nostra  
videbatur; vt simus & mente & religione destituti. idq;  
singulari Dei prouidentia statutum stabilitumq; arbitre-  
mur, vt sanandis nouis morbis, nouum medicorũ genus  
exurgeret, nouas remediorum species nouam curatio-  
nis rationem afferret. Receperunt olim in patria maiores  
illi nostri optimi & sapientissimi viri, Robertos Italos,  
Paulinos Gallos, Adalbertos Bohemos. nec ignominiam  
duxerunt ab illis discere quæ nescierũt. Procedete tẽpore,  
receperũt & D. Augustini Africani, & D. Francisci Itali,  
& Diui Dominici Hispani, & Diui Basilij Græci socios, &  
discipulos, quorũ alij nos ab impio idolorũ cultu, ad vni-  
us veri Dei, & filij eius Domini nostri **I E S V C H R I S T I**  
cognitionem verbo & exemplo adduxerunt, alij pietatis  
& sanctitatis exemplis, orationumq; præfidiis, Regnum  
hoc florens & incolume, in confessione veræ & indiuiduę  
Trinitatis, cuius hodie memoriam agimus, sine vllius er-  
roris admixtione, totis ferè septingentis annis ita conser-  
uauerunt; vt cum vicina nobis regna & imperia ab vnita-  
te Orthodoxæ fidei, vel Hæresi vel Schismate distrahe-  
rẽtur, Mosci & Rutheni, Græco, Bohemi & Morauj Huf-  
fico; Traces & Bulgari Mahometico, nostra per Dei gra-  
tiam Polonia, nullum vnquam malum ex vicino malo  
traxerit, sed sicut rosa inter spinas; sic illa sese eorũ quos  
dicimus præfidio, virginem castam exhibuit Christo, &  
quàm par erat, Deo vero, constantiam repræsentauit, vsq;  
ad hæc infelicia tempora, cum Lutherus odium illud  
Dei omnipotentis (& si homines odissent quos oportet,  
etiam omnium hominum pestem) è vicina Saxonia ante  
annos quinquaginta afflauit. Si patriam à minimis inijtis  
in hanc



in hanc quam videmus amplitudinem & maiestatem ex-  
creuisse gaudetis, vt à palude Meotica, ad mare vsq; Balti-  
cum pertingat: & vicissim à Borysthene vsq; ad Oderę lit-  
tora extendatur, tam sanctis legibus descriptā, tamq; pijs  
moribus constitutam; cogitare debetis, hæc omnia cum  
illis quos diximus, dicerem & per illos, nisi militis alicuius  
fremitem timerem. nam maiora sunt orationū quàm  
armorū præsidia nobis à Domino contigisse. Nihil vt esse  
pertimescendum videatur, ne nouum hoc Religiosorum  
virorum genus, in patria destruat; quod Robertus, quod  
Adalbertus, quod Augustinus, quod Basilius, quod Frā-  
ciscus, quod Dominicus ædificauit. quin potius huic  
qui maiorum instituta perturbant, hæreticorum cuneo,  
has Iesuitarum acies obiectas & oppositas putate. non  
castris & armis, sicut olim Cruciferi, quorum adhuc no-  
men horretis, instructas; sed timore Domini, sed amore  
proximi, sed zelo, sed bonis litteris, sed exacta rerum di-  
uinarum scientia & cognitione munitas. Non illi vestra  
vobis eripiunt, vt falsò accusantur; sed diuina tribuunt.  
Verumtamen si vobis spiritualia seminant, quid magnum  
est, vt aliquando vestra carnalia metant? Si res nouas &  
maioribus nostris inauditas, si fides, si mores, si ignotas  
prioribus seculis sanctitates in patriam inferrent, causam  
non dicerem. Sed cum veterem illum pietatis & sanctita-  
tis splendorem, quasi quodam situ, & squallore cooper-  
tum, cum illis ipsis, quos fertis in oculis Hofiis, Crome-  
ris, Patriciis, Orichouis, Gorfciis, Socolouis, Pouo-  
douis instaurant, (Libet hac vti similitudine) dum illi al-  
taria & Diuorum imagines perpoliunt; isti etiam templi  
pauimenta, & vilissima quæuis peristromata perpurga-  
re non negligunt; omniaq; siue parua siue magna & audēt  
& agunt, quæcunq; tandē requirit pereuntis salus; Quid  
causæ esse possit, vt homines salutis vestræ cupidissimos  
patria pulsos, & omnibus infortuniis dignos arbitremini  
non video: idq; iterum atq; iterum affirmo, qui hæc vobis  
L furoris



furoris & amentia plena Scythica planè, barbaricaq; cõ-  
silia suggerunt, eos non tam Iesuitarum, quã totius Reli-  
gionis Christianaẽ odio ardere. quod si verbis negant, re  
& veritate præstant. Quorsum Trinitas veneranda bla-  
sphemiis lacerata? Quorsum maiestate sua Iesus Dei vi-  
uentis spoliatus? Quorsum furta Sacramentorum, quæ  
populo Dei sine fronte & mente Euangelici clepserunt?  
Videte quæso vos templorum par ietinas, Altarium ruder-  
ra, Imaginum euerfiones. Videte martyria Episcoporum,  
exilia Sacerdotum, contemptũ Sanctorum. Cur in Ger-  
mania 20. millia templorum spoliata? Cur in Anglia 10.  
millia diruta? Cur in Gallia 300. millia Catholicorum  
trucidata? Cur in Flandria in legitimã potestatem arma  
sumpta, imma summis paria facta? Cur diuersis in locis  
200. millia Sacerdotum excarnificata? Cur in Scotia  
Reges oppressi? Cur in Gallia ad cædem postulati? Cur  
à Turcis perfidia ad vniuersa Christianitatis perniciem  
petita? Dies deficeret, si furores omnes Euangelicorum,  
& ab illis suscepta consilia recensere vellem. quorum hæc  
summa, hic solus & vnus scopus est; vt aut Leges aut Re-  
ges pereãt. Sed & in patria nostra, quorsum Iurisdictione  
sua spoliati Episcopi? Quorsum ereptæ decimæ? Quo-  
sum confederatio extorta? Quorsum Clerus vniuersus  
ad bellicas expeditiones postulatus? Quorsum Ecclesia-  
stica iura in exilium acta? Non Iesuitarum capita, credi-  
te mihi Senatores, nec inuisa multis Ecclesiastici ordinis  
maiestas, istis consiliis petitur, sed per Ecclesiasticorum  
latera Christianaẽ Religionis iugulum ad necem postula-  
tur. quæ si vnã ceruicẽ haberet, eam certè Euangelici præ-  
cidere non dubitarent. Nunc autem quos violenta non  
possunt, lenta quasi morte conficere cupiunt. vt si fieri  
posset, sine sensu doloris pereamus. atq; ad extremum sine  
Deo & sine Christo eius maneamus. simusq; sicut habet  
Esaias; quasi à principio, quando Deus nõ dominabatur  
nostri, neq; inuocabatur nomen eius super nos; Lelicola,  
Polelicola,



Polelicolæ, Piorunicolæ, Serpeticolæ, Babicolæ. amissâq;  
 luce veritatis ad baratrū redeamus infidelitatis. Sed absit  
 hoc à patriæ charissimæ capite. Absit ab hæreditate tuâ  
 Christe, quam tuo sanguine redemptam per 600. annos  
 in Ecclesiæ sponsæ tuo gremio fouisti. Credebant, ô Se-  
 natores, in Deum maiores illi nostri sine Serueto & Gen-  
 tili, sine Blandrara & Gregorio, Habebant Sacramenta  
 sine Lutero, Sumebant corpus Christi sine Caluino, Ba-  
 ptizabantur sine Pacimontano; & Cechouicio, Iustifica-  
 bantur sine Osiandro, Matrimonio iungebantur sine O-  
 chino, Manebant in Ecclesia sine Fricio: aut si ipsi sedu-  
 cti, nos seduxerūt (quod absit vt cogitemus) culpa omnis  
 tua erit ô Christe; qui è sinu summi Patris nimis citò de-  
 scendisti, nimisq; citò Apostolos tuos ad Euangelij præ-  
 dicationem dimittere properasti. Nam si ista Lutheri &  
 Caluini tempora expectasses; longe quàm Perrū & Pau-  
 lam fidioliores diuinæ tuę voluntatis interpretes & inter-  
 nuncios habuisses. Frustra ergo nos Adalbertus & Sta-  
 nislus docuit, frustra sanguinem fudit. Frustra Boleslai,  
 Casimiri, frustra Iagellones, frustra Sigismundi, baptisma  
 receperunt, bella pro Christo gesserunt, templa erexerūt,  
 Collegia constituerunt, seruos Dei auxerunt, xenodochia  
 suscitarunt, redditus attribuerunt, Frustra Sacramenta  
 sumpserunt! Quicunq; hæc de optimis Regibus, deq; ma-  
 iorum pietate existimant, eant sicut habet Athanasius, &  
 ossa eorum è monumentis eruant, vt ab omnibus intelli-  
 gatur, & illos fuisse seductores, & istos parridas esse.  
 Sed tu Christe da mentem istis hominibus meliorem, vt  
 aliquando tamen doctrinam veritatis. in Cathedra vni-  
 tatis collocatam, intelligant. Ego verò finem facio  
 si vos adhuc admonuero, Senatores, Euangeli-  
 cos & reliquum orbem Christianum  
 stare simul non posse.



Faint, illegible text, likely bleed-through from the reverse side of the page. The text is arranged in approximately 20 horizontal lines, though the characters are too light and blurry to be transcribed accurately. Some faint words like "et", "in", and "de" are visible.